



特 別
^18
4892
7



八七
4892
7

明詩綜卷十五下



小長蘆 朱彝尊 錄

震澤 席永洵 緝評

鄭 梃 二首

梃字叔高浦江人元宣政院使渭之子

擬古 二首

秦箏一何哀中有淒涼音纍纍孤臣操咽咽嫠婦吟晨
霜為之寒浮雲為之陰聽罷復三歎不覺淚沾襟披衣
步庭皋嘉樹鳴曙禽嗒然吾喪我情與海水深
孤齋悄無人絳燭夜吐芒羽蟲忽飛來投火欲自戕知
為明所誤曷不務韜光子房願封留淮陰喻弓藏法戒



既昭然昧者何茫茫高山有白石行當煮為糧

鄭 杖一首

杖字叔韡槌之弟宋學士女壻也有學古齋集

懷宋學士

亦知離別遠喪亂近何如流水天涯路征鴻塞外書
縣飛雪晚點點落梅初日月重回首那堪已歲除

鄭 榦一首

榦字叔恭亦槌之弟從宋學士游永樂初以薦授監察御史

詩話叔恭宣撫廣東民以取珠為苦至即奏罷永樂十二年年已七十有二矣值長陵埽平沙漠因進五言詩帝歎曰可謂滿朝詩伯第一叔恭因告歸帝予敕書許致仕賜宴於禮部界以金繡衣問誰可代者叔恭舉從子堪御筆即除御史義門謂為盛事

寄宋仲珩

鷺斯桑下飛青鳥海上游如何不同調羽翼有短修
故人昔相見時時話綢繆出入念同車無衣念同裘一朝
參商如豈不懷百憂初盟儻不渝在遠情愈周但願似
夙昔烏用苦相求

鄭 桐一首

桐字叔成榦弟洪武中以薦授滁州判官

春思

梨雲澹澹霧濛濛人在青樓第幾重鸞鏡未開簾木卷
羅衣先怯五更風

高伯恂一首

爵里未詳詩見光岳英華

寄梁紹輝

花時醉裏恁恁別回首西風錦樹秋明月相思隔江浦
素書不見到林丘松陰塵榻晴還拂池畔清樽晚更留
山水閒情宜共賞碧雲涼鴈思悠悠

梁紹輝 一首

未詳詩見文翰類選

登小孤山亭子

飛亭結構半山隅雲影天光入画图清漲九江吞漢沔
高標孤柱限荆吳風來舟楫欹危疾雲暗魚龍變化殊
獨倚画闌吟不盡白雲飛處寸心孤

張迪 二首

迪字文海華亭人

宋徽宗画半開梅

上皇朝罷酒初酣寫出梅花蕊半含惆悵汴宮春去後
一枝流落到江南

章 閏 一首

未詳詩見皇明風雅

送張二貢士

煙靄散春晴亂鴉深樹鳴千山懸落日一騎出孤城急
管催離宴飛花惱客情殷勤懷上策謁帝向承明

王 超 一首

未詳詩見荆溪外紀

張緒歸舟

落日半帆收張溪古渡頭花明汀樹雪香冷渚蓮秋碧
浪搖檣影青山枕舵樓曾知風景好記此一停舟

黎充輝 一首

充輝字睿之臨江人

府志云充輝名慎

山雲辭將歸作

清江兮淙淙上有山兮穹窿白雲兮谷口一碧兮千峰
晻靄兮絕壁挂偃蹇兮長松朝迎兮秋陽暮卷兮秋風
山之人兮雲從被薜荔兮攀芙蓉來乘雲兮朝九重跨
一鶴兮江東點汀花兮白蘋雨霜葉兮丹楓忽雲歸兮

人遠山蒼蒼兮倚晴空

丘輔仁 一首

輔仁字友文歸安人

詩話友文少有志行不樂華靡母衣之以綵帛報顏不服長博通經史
恥為章句之學潘元明據湖州使人召之亡去洪武初始歸里業農終
其身詩集失傳

南湖

南湖二月水如天羅綺東風醉少年十里好山多看盡
琵琶催撥夕陽船

謝林 三首

林字璫樹武進人應芳子有雪樵集煮雪窩臺

詩話璫樹名林本係一人列朝詩集複出誤也

穎城鳳皇臺

鳳皇臺臺何高野雲黃葉風蕭騷不聞孤鳳鳴但見鳥
雀棲蓬蒿梧桐摧折傾舊巢鳳子何處翔赤霄無由再
覩兮使我心勞

梳洗臺

雲為裳月為璫鄭姬不見臺已荒千年臺下土花碧猶
帶洗時脂粉香今古繁華易衰歇溱洧水流聲嗚咽曾
識宮中歌舞人只有臺前舊明月

青城虞勝伯顏丘氏小軒曰看帆為賦律詩因以
寄予次韻錄奉彥章

風帆已逐歸雲盡江水何如客意長荏苒歲華駒過隙
飄揚生理鴈隨陽從知白髮非春事醉看青山即故鄉
獨笑夢中忘未得落花風起動回檣

張端義一首

未詳詩見鐵網珊瑚

送張吳縣之官嘉定分賦得錦帆涇

風吹闔閭城花落錦帆涇錦帆去不返春流日夜生故
人在何處恨滿城邊路月明烏夜啼霜冷丹楓樹涇水
抱城流直通東海頭布颿挂落日相送練川游

徐文舉一首

文舉武進人

賦得百花洲

春花迷繡幄春水漾金鳧照影和明月流香過石湖錦
帆應不見沙鳥自相呼感舊復傷別愁傾雙玉壺

詩話金增張德常起家吳縣丞歷縣尹遷嘉定州同知其行也諸名士
分賦吳中舊蹟送之廣陵成廷珪得龍門廬山陳汝秩得采香逕宛丘
陳秀民得靈巖吳郡鄭元得越公井錢唐范致大得石湖江陰張端得
林屋館青丘劉堦得虎丘太原王逢得劔池蘭丘聶鏞得天平山四明
陳朴得白雲泉會稽張憲得吳王井四明陳經得太湖石勾吳周砥得
洞庭山晉陵張體得琴臺巴西鄧德基得玩花池清河張端義得錦帆
涇崑山盧熊得館娃宮吳郡王行得放鶴亭渤海高啓得響屨廊高郵
龔宜得梧桐園吳郡黃本得白公檜延陵徐文舉得百花洲江陰張瑄
得采蓮涇海昌董翔鳳得辟疆園無錫顧常得夫椒山而遂昌鄭元祐
亦賦采香逕且為之序卷中賦鱸鄉亭者脫去姓名吳人朱存理編鐵
網珊瑚具
載其詩

余 詮 一首

詮豐城人

海水操

陳母莊傷其夫溺死於海作

海水蕩滂予茫無津涯夫君一去予杳無還期為死為
生予曾莫我知欲往從之予襁褓有兒同室同穴予我
志獨違恨深海水予曷其已而

劉 堦 一首

堦字公坦江陰人

題東章孟山水

廬江公子稱三絕詩妙書精画亦工落筆多宗董北苑
高情不減米南宮天低碧樹春雲合潮滿滄洲暮雨空
却憶買船同載酒城樓山館醉東風

如 湜 一首

詩宗卷下五

湜字季清無錫人有瓜膚集

楊白花

楊白花身輕不由己一夕長風生飄飄度江水江南處
處好繁華悠揚落地知誰家知誰家不復歸永巷春深
人迹稀悲歌連臂空腸斷回首長秋鴉亂飛

馬 磨 一首

磨字公振崑山人有醉漁草堂二集

和楊廉夫新居韻

楊子樓居飲馬河書舟日日穢晴波未論粟里功名薄
總為夔州詩句多遠樹入簾秋若薺亂雲渡水白於鵝
何當共把凌風袂醉和仙人鐵笛歌

蕭 岐 一首

岐字尚仁泰和人明初以賢良徵為潭府左長
史固辭謫楚雄儒學教授改平涼學訓導有正
固先生集

入閩

自入閩中道偏諳物外情田從山下種船向石稜行海
味空多族榕根盡倒生連城公館好驛使遠相迎

顧 協 五首

協字允迪無錫人貢監生有鳴志集

詩話允迪以諸生貢入成均詩有脫却朝衣換布衣之句則亦
通朝籍者詩頗清穩五言如亂峰烟外紫殘日樹頭黃佳句也

待鶴

白鶴去何之想在蓬萊頂月下漫沉吟衣沾露華冷夜
久不歸來立盡青松影

次錢助教見寄韻

窮巷誰相問蕭條獨掩扉雨中花旋落江上燕初歸計
拙身從懶才疎事轉違思君長入夢莫怪往來稀

送張翰臣幕掾還廣西

曾持刀筆贊元戎不數區區野戰功青鬢消磨千嶂外
舊交零落十年中雪晴官路梅花白雨熟蠻鄉荔子紅
三十六原何處是馬蹄輕踏綠楊風

舟中次韻

西風吹老白蘋花獨倚歸舟感物華漠漠秋雲暗山谷

不知何處是吾家

孟夏書事

脫却朝衣換布衣始知今是昨來非綠陰庭戶無人到
惟有一雙新燕飛

陳鈞一首

鈞字衡臣羅源人洪武中以人才薦官建德縣

丞有退軒集

徐審之云衡臣詩體
法聲調一軌於正

題金山壁間画

空翠忽入戶飛來何處峰人家多傍樹僧寺不聞鐘流
水衝橋急閒雲出岫慵何當撫琴坐願學卧遊宗

鄔修一首

修字存誠南昌人洪武丁丑進士歷官太平知府

中秋分韻

秋月已成規秋闈猶列戟妙契結金蘭今夕是何夕時序有代謝情懷增感激對酒發新吟此樂良難極

和平

詩話革除四載文獻無徵成化初吳人劉昌提督河南學政得建文元年湖廣鄉試棘闈倡和詩集中作者豫章胡儼若思歸修存誠廬陵謝矩子方陳孔丘 鄱陽洪初善初闕張勉學思哲江陵熊劍伯機蜀川郭璉孟温聶潮貴廷輔會稽陳安惟康馬文炯 三衢張起師震何遠思道清江秦士誨文政郡筒王景應星萬川冉通穎達桂林唐昉景升維揚李輅文載柳州莫忠彥良容山周迪道通廣饒素本子凡二十一人昌鏤板以傳且序之曰是科所取第一人寧太師石首楊文定公而胡公評其文謂能為華子之正言不效公孫之曲學愚按福建是科領解則建文文敏公明年文定文敏俱成進士而胡文穆廣全文情幼秋胡忠安漢顧麟肅仕首建文庚辰梅釋褐者

亦同

同字孟符吳人

倪雲林画

雲開見山高木落知風勁亭下不逢人斜陽澹秋影

梁 案一首

案字弘字南海人

寄董宗輔

東江去悠悠送子孤行舟舟行復幾時江鄉生遠愁海水無定影萍蹤忽飄浮雖非千里別出門成久游采采芙蓉花欲寄無輕郵念昔攜好手中情鬱綢繆商歌寄逸響素琴鳴芳洲如何曠高躅杳若隔山丘馳情託緘

素日暮風颼颼無由慰離索一鴈橫高秋

屈翁山云取材古人以離見合

王敬中一首

敬中字敬中鄞縣人洪武辛亥進士刑部主事

題丹丘

四窗山色秀可攬雲根石屋高嶙峋林間遺鳥曾化虎
洞口獼猴渾似人奔流直下幾千尺高蹈今逾四十春
靈光夜夜照丹室應有飛仙來往頻

陶琛二首

琛字彥珩吳縣人

過徐良夫耕漁軒次倪元鎮韻

西山久思往經春復逾秋迴看岸傍樹尚繫煙中舟日

月倏飛騰不異川波流至今遠游興浩然殊未休東風
江上來沄沄水生洲便欲引雙屨飛行紫巖頭如何苦
蹉跎徒睇雲路修谷鳥在林杪鳴聲亦相求今君展清
燕胡不邀同遊開館集羣彥翩翩文采優相逢尚難得
况兹旬日留懽然對樽俎情意兩綢繆嗟彼丘壑賞豈
顧茅茨幽愁來發清詠獨倚城南樓

詩話吳中徐達左良夫耕漁軒名士留題甚眾朱德潤澤民為作圖仇
機沙大用作傳高遜志士敏作記唐肅處敬作銘王行止仲作序楊基
孟載作說釋道衍作後序因編為金蘭集其十二世孫大業受業於子
出先代所遺詩箋百餘幅正草篆隸靡所不有如東筍然皆元季明初
諸公手蹟也未幾以訟破家悉為有力者所得過眼
雲烟不復可觀矣惜哉自陶琛以下三人均集中詩

題江參長江圖

石出夜潮落山明寒霧消江空千里權村迴一歸樵樹

色連沙嶼人家傍野橋還同舊棲地風景日蕭蕭

余震 三首

震字以聲

九月廿一日偕范孟學李德輿訪徐良夫耕漁軒
是夕乘月過溪寺登擁翠方丈分韻得下字

商森發清秋孤月耿深夜玄賞悟真情況茲幽林下蕭
蕭殘葉飄瀏瀏飛湍瀉驚鵲鳴高枝流螢遶空榭芳絃
既已歇佳詠豈云罷復與道人期逍遙宿精舍

月下聞琴別邵先生包秀才

孤光澹燈室微煙繞香几誰彈膝上琴夜半離聲起瑟
瑟度涼風泠泠寫秋水流音松竹外却憶空山裏

過邵弘道先生墓次韻

孤墳四尺鳳岡前此日重來又一年新土有痕分草色
舊蹊無跡長苔錢殘花自落山中雨遠樹空迷嶺外煙
回首令人多感慨賦詩揮淚寫長箋

董遠 一首

遠字仁仲

城頭烏示良夫

城頭擊柝邊月低啼鳥繞樹寒不棲天邊明星白如日
空階落葉風淒淒房帷靜悄夜何永青燈無眠照孤影
蠨蛸在戶人未還關河十月衣裳單

謝常 三首

常字彥銘吳江人洪武中舉秀才召試丹鳳朝陽賦稱旨帝欲官之辭歸隱震澤東溪有桂軒

東溪集

詩話彥銘楊廉夫弟子詩尚纖麗縣志稱洪武末舉秀才帝欲官之辭疾不拜考集中詩事在洪武十五年八月其詩云歸養慈親荷聖恩喜傳天語出金門河陽敢問花誰種彭澤應知菊尚存則以養親辭非以疾辭而所辭之官似屬縣令也又寄靈谷定巖長老詩序云不肖衰朽目昏髮毛皆雪幸有老母百又六歲荷蒙恩渥勅許終養足為明證矣集又有永樂元年八月陪祀縣庠丁祭及鄉飲分題之作句云喜當時盛陪清列或者曾攝邑校邪

竹枝詞送別

闔閭城邊楊柳黃吳姬如花明月瑤送郎不勸銀罍酒
持贈雲鬟金鳳皇

和靖觀梅圖

孤山歲晚水迢迢竹外橫斜挂綠么吟到暗香疎影句
黃昏月上雪初消

攜琴訪友圖

秋林紅葉晚蕭蕭乘興攜琴過野橋人在翠微尋不見
白雲如練束山腰

吳中一首

中字宗本自號青霞處士有林霏集

白鶴山

吳興多名山茲峰特奇秀不知自開闢陰陽幾昏晝云
有未髭僧冥棲刻蓮漏香臺儼有在祥室已新構松下
伏神龜竹間走飢鼯白鶴不受招仙蹤亮難究伊音屢

登臨空翠濕衣袖窮按不知疲幽討寧嫌逗巖扉與澗
戶一一為重叩和詩寄山靈餘生敢多又

劉子建 一首

字里未詳

浦城慢興

清溪何似百花潭谷口雲峰半夕嵐借問子真歸隱未
鷓鴣春雨滿江南

謝恭 一首

恭字元功長洲人徽弟有蕙庭集

過張水部樂園林館和高季迪韻

故人非傲吏舊隱勝愚溪塵世人難到空林鳥目啼青

山懸榻下綠樹斷厓西終日無餘事長吟信杖藜

潘子安 二首

子安和州人有海天清嘯集

詩話子安詩見渤海耆英詩集其字未詳吾鄉郁氏書畫跋載有潘伯
濟題畫詩云云全篇清婉繹其名字疑是一人然未敢臆決附錄之俟
再考

九日王時融招飲

喜見長鉶破曉封忽移春暈上衰容故人已覺樽前少
佳節偏於客裏逢千里暮愁連蟋蟀無邊秋色醉芙蓉
而翁此際登高處應在三山第一峰

題畫

岷峩雪消春水急瀟湘雨餘雲樹濕迢迢翠嶼孤鶴迴

湛湛珠宮老蛟泣征帆數點風濤中出沒不計天西東
鄉關杳渺在何處矯首遙送雙飛鴻

陳士楚 一首

士楚揚州興化人

書錫山驛

嗚嗚画角冷涵秋一曲梅花動暮愁不管江南斷腸客
夜深吹上月明樓

沈應 三首

應字德虔吳縣人

元夕

燈月滿春城金吾縱夜行誰家無画鼓何處不銀箏願

以昇平樂懽歌荅聖明

次錢文伯題雲林詩韻

紅葉橋邊草舍低半灘斜照水平溪舊時曾記題詩過
疎雨桐花一鳥啼

看山

老年已免綴朝班林下於今許我閑流水小橋紅葉逕
杖藜隨意看青山

史謹 一首

謹字公謹崑山人

過七星關

萬里投南徼層關度七星嶺雲和瘴黑木葉向冬青路

遠家難問愁多酒易醒相逢但樵牧何以慰飄零

朱武一首

武字仲桓紹興山陰人

張子正春雨鳴鳩圖

東風簾卷小紅樓三月梨花喚錦鳩曾記玉人將鳳管
隔花抵按小梁州

吳倫二首

倫字文伯吳人

茗溪春曉圖

夜聽溪上雨曉看溪上山雨歇山更佳尚在空中濛間白
雲掩疎鐘綠樹迷遠島居人想未起村村自啼鳥

賦得秋江送別

秋陰日易夕江空歲云晏惻惻傷物情悽悽屬昏旦
從秀林際峰流響雲中鴈煙蕪銷遠綠霜楓炫餘粲時芳
遞衰榮人事更聚散方敦金蘭契遽念蠨蛸歎風駕嚴
霜寒晨起明星爛揚船子夷猶伏枕我羈絆那知惜睽
離矧復值憂患愁吟不成章一辭媿能贊

徐基一首

基字立本臨海人

寧海道中

中歲事行役勞生卒未休大星垂野白遠水際天流土
俗魚鹽富民居橘柚稠何年謝塵鞅歸卧此林丘

陳文東

文東字同 松江華亭人

宿陝州橫渠鋪

獨客卧車上 羣僕卧車下 車前或明火 時時照牛馬

朱希晦

希晦樂清人有雲松巢集

詩話處上元季與吳王一趙彥銘隱居鴈山時稱鴈山三老明初不仕有薦於朝者朝命未至而卒集為七世孫玄諫刊行其夏日書懷云白髮生涯人已老綠陰時節兩偏多寄友云煙色春歸楊柳底雨香紅入杏花初傷時云城邊向晚黃孤立海外何年白雉來自歎云家貧猶具千金帚國難曾無一箭書訪僧云松陰夜靜鶴初警花院日長僧未還皆佳句也

客邸中秋對月

去年中秋秋月員浩歌對酒清無眠 煙霏滅盡人境寂

仰看明鏡懸中天今年客裏中秋月靜裏金波更清絕
可憐有月客無酒不照歡娛照離別夜闌淅淅西風涼
月中老桂吹天香悠然長嘯動歸興坐久零露沾衣裳
浮世悲歡何足數庾樓赤壁俱塵土風流已往明月來
山色江聲自今古

納涼

無事解衣坐超然心境空深林翳炎日萬壑來天風閒
停白羽扇拭拂朱絲桐醉罷不知夕月生滄海東

寄友

雨過溪頭鳥篆沙溪山深處野人家門前桃李都飛盡
又見春風到棟花

甘復二首

復字克敬餘干人有山窗遺橐

曉出西園由谷中歸

披褐陟西園煩襟散清曉微風動高樹零露下芳沼始
行幽谷中忽出青林杪流水漂餘花修筠度啼鳥身緣
翠石迴思逐白雲杳負杖孤賞懷春闌綠陰悄

送別

涼颺應秋氣草木斂華英客游總念歸子有千里行
息儔侶催悄悄離思盈丈夫懷志氣孰不戀榮名華薦
起當路使者促前征追餞東門道把酒哀絃鳴蕭條野
驛暮泛豔江波清密謀植帷幄慰彼蒼生情古來盛名

士多是起釣耕

鄭洪二首

洪字君舉永嘉人有集

詩話鄭君舉詩一卷曹侍郎古林藏本侍郎題是永嘉人而鮮于伯幾
書趙子固水仙卷稱元貞二年正月同餘杭盛元臣三衢鄭君舉觀于
困學齋初疑君舉乃三衢人然考周玄初來鶴詩有永嘉鄭洪君舉之
作見鶴林類集則君舉為永嘉人無疑來鶴事一在至正十七年一在
十八年一在洪武十四年一在十五年一在二十七年

吳山白塔寺

江山襟帶尚依然王氣銷沉已百年八葉龍孫東渡海
六宮虎士北歸燕銅駝荆棘荒山裏石馬莓苔落照邊
玉匣游魂飛劫火五陵無樹不啼鶻

寄毛府判

南湖水長沒蒹葭西浦橫橋對白沙鴻雁來時菰有米
鳳皇飛處竹無花石田賦寫張平子雲閣書通蔡少霞
零落江陵千樹橘青門猶戀故侯瓜

朱友諒

一首

友諒嘗熟人詩見鶴林類集

周尊師禱雨歌

道人鞭龍出潭底黑雲一片小頭起仰看紅日不見光
黑龍頭搖白龍尾有時登壇步七星一呼一吸成雷霆
白波翻空海水立銀河落地天瓢傾去年京師禱雨雨
輒至大田小田總霽霈定知夜半拜封事自有精誠感
天地王公貴人知其賢屈師闡教來琴川今年旱魃又

為虐禾稼半死民熬煎縣官投詞庶人跪道人受命應
且喜笑書鐵牌役海鬼疾驅一百五十里甘泉龍居萬
丈深神符召集如飛矢今朝雨脚來自南半是吳江四
橋水頂山有龍名太白口喫湖水成甘澤道人驅龍喝
龍出五雷使者閒不得龍兮龍兮一喫日失色金蛇掣
電光千尺再喫山氣黑飄風盤旋走沙礫上天有寶不
愛惜噴下驪珠千萬石兩龍行雨勢未休須臾潦水平
田疇疲農入城報沾足道人一笑山雲收

詩話尊師世居嘉禾從紫虛觀李拱瑞為道士李南谷杜真人高弟也
周伯溫紀略云先生受法於顧養浩步雲岡受之張雷所雷所受
之王繼華繼華受之莫月鼎宋景濂傳略云雲川有莫洞一授其徒王
繼華繼華授張善淵善淵授步宗浩宗浩以授尊師禱雨事一在洪武
元年一在二年永嘉鄭思先序之思先詩云道人綠髮雙青瞳自言前
身河上公歛騎黃鶴辭帝宮歸來塵世發羣蒙海虞福地秀所鍾七星

老檜摩蒼穹道人重來御冷風屠維作噩歲式逢季夏旱燠何熾燼縣
令延師師說從飛書上奏徹九重鐵券怒起神淵龍左驅飛廉右豐隆
天地俄頃驚晦曠甘霖注地疾若春千村萬落沾渥同頓回枯槁蘇疲
癯旋斡造化非常功道人拂袖喜滿容笑指霽日扶桑東其篇法頗與
友諒相近然不若朱之朗朗也思先
官至福建布政而温州府志失載

葉谷亮 一首

字里未詳詩見沈巽明詩選

邗溝懷古

丞相三軍出曾聞此散亡黃蘆今夜月白骨舊時霜世
已尊王室人猶說戰場維舟重感慨涕淚在衣裳

胡温 一首

温字遵道會稽人

詩話温異人也少落魄湖海閩後入閩性好飲不常得人方置酒不問
主客徑造飲酒盡不謝而去日出行市中羣小兒逐之呼曰風子温顧

而自笑夜宿古祠下雖寒冬雪甚衣布單衣履草履身不顫慄人或遺
以衣行不數步遇寒者輒解予之鮒馬都尉王恭守閩孝陵賜以織金
裘衣僉具酒賀温突入曰某亦賀公持酒覆其衣恭不為忤温亦自若
漳帥徐玉好士温特過其家玉召飲同官俄而温至歌詩起舞至慢罵
坐客玉亦不厭也過元漳州守洪理迷世祠酌之水祭以文曰衆之生
不如侯之死侯之死名長在此萬歲千秋元之臣子拜已大笑而出著
書名曰竹帛流芳載元忠臣義士并貞烈女敘其本末系之以辭類鏡
歌輕重皆有深意一日告徐玉曰吾將歸矣負囊行三舍為關卒阻而
回發囊中止有硯一易酒飲之起舞作喜鵲之歌歌畢仰戶而死時洪
武七年冬也玉葬之漳州西門外天台林公輔為作胡風子傳其大略
如是公輔稱其生死如在已
蓋冷謙張邁週周顛仙一流

歌

閩山喜鵲少越山喜鵲多如何不歸去其奈羅網何

明詩綜卷十五

明詩綜卷十六

小長蘆 朱彝尊 錄

中吳 徐惇復 緝評

方孝孺 十三首

孝孺字希直一字希古臨海人建文中文學博士靖難兵至首以身殉沒後嚴禁文字門人王

稔藏之傳有遜志齋集徐子元云希直文章大家詩亦豪壯非所長也李時遠云正學詩

渾朴淳正大率如其人

靜志居詩話正學先生文昌明博大開闔自如雖有小韓之名實與大蘇相埒潛溪學士贈詩云方生來海上玉立而春温同餐太倉粟共勘典與墳莽蒼扣無始溟滓窮無垠宇宙所管攝載籍所敷陳終始鈞錙之苦大樂建鈞律呂按高下宮商肅君臣黃鐘壓瓦釜庭燎滅鬼燐以茲稽古力可敵戡定勛濡毫寫雄顛勢足移峨岷漏泄渾沌竅出入造化神盡抽神奇秘不隨臭腐塵所以自出之愈見光景新振古著作家

後先各續紛豈知萬牛毛難燬一角麟葉夷仲亦贈詩云雄文細字塞
巨帙雅辭宏論開心局其險過雲漢其幽通窈冥瞻如戈甲積晉庫奇如
盤鼎鐫商銘麗如勾芒青春布花卉壯如豐隆白日驅雷霆千流萬派
怒奔放終然帖帖趨東溟持以用世不啻如養生之穀粟濟疾之葠苓
直須上追虞書婉周雅於以作春秋之羽翼為禮樂之藩屏其傾倒也
至矣說者謂先生詩非所長然五言熟精選體當在潛溪華川之右其
談詩絕句云舉世皆宗李杜詩不知李杜更宗誰能探風雅無窮意始
是乾坤絕妙辭又云前宋文章配兩周盛時詩律亦無儔今人未識崑
崙派却笑黃河是濁流又云天曆諸公著作新力排舊習祖唐人粗豪
未脫風沙氣難抵熙豐作後塵其意蓋辨香東坡居士也予謂先生宜
配食孔子之庭嘗贊柯納言箴疏請于朝廷議以先生但能成仁
不可謂道學且祇有文集而無語錄以是抑之納言幾獲罪不知語錄
乃浮屠家法耳祀典闕如不能無望于後之君子

休日奉陪蜀府諸公宴集

居閒歎時邁閱世知才短頻為觀國遊每覺歸期緩羣
公盡耆英過從殊恨晚他鄉親故稀骨肉不在眼非資
談詠歡孰使離情展大藩仰仁哲政化崇寬簡長日自

優游茲辰况休澣牲醪出珍賜果蔬隨物產一觴偶相
酬萬慮皆可遣貴同周士肆狂笑晉人嬾語樂天趣深
心清市塵遠新秋欣已至毒暑行將斷靈雨席上來微
涼座中滿明時古難遇良會世所罕各勉存令猷垂聲
繼伊管

閒居感懷 三首

竊竊衆所憂不踰衣食間孰知温飽外可憂非一端賤
憂道難行貴憂名不完誰能斷棄此自樂如孔顏
我非今世人空懷今世憂所憂諒無他慨想禹九州商
君以為秦周公以為周哀哉萬年後誰為斯民謀
士無及物智每喜華其廬我居豈不敞於道亦有餘明

取容吾身奧取藏吾書奚須歎其陋不見阿房初

次王仲縉感懷韻

翠鳥質微細乃以羽自戕犀象獸之雄每因齒角亡物
生無巨小適用反相傷犬羊死柔弱虎豹死暴強彭聃
死於壽夭者死於殤萬生誰長存所貴德譽光古來志
節士立身有大方孰云蕭艾藜果勝蘭蕙芳

上巳約友登南樓

生意忽滿眼不知春淺深良朋曠嘉會濁酒難孤斟迢
迢城上樓高朗宜遠臨曷不一舉趾縱望淵與岑逍遙
羣動表舒豁萬古心古人已寂寞繼者應在今蘊真有
至樂外慕非所欽願言領衆妙無為鬱沖襟

感橙樹有作

有序

秋林道傍有橙樹處荆棘中不知幾何年會增
置驛舍芟夷堂基斧斤幾及遇識者知其為果
實之美也獲免築室既成正值窗牖間結實纍
纍然可愛過而見焉感而為之賦詩

橙生蜀山裏蕪沒荆棘場荆棘忽翦除孤根虞見傷幸
遇識者顧扶植不忍戕築室適在茲窗牖正相當花垂
素雪盛葉茂青雲張方秋氣盛肅原野飛早霜衆木不
復榮百草已罷芳纍纍枝間實爛爛半青黃摘置樽俎
間几席有餘光豈惟巴人羨南服亦罕嘗鬼竅帝王宮
異味來萬方何以解煩渴甘酪間蔗漿此物儻前陳玉

食益馨香可令積疾蠲坐見人情康惜無先容者盱彼
塗路長遇世良有會處已貴安常歲寒善自保用舍隨
行藏

歲除祭先奉懷家兄次文公先生病中呈諸友韻
日月行不息我亦少安居違家今幾何忽復五載餘微
官誤人事解令親者疎每思別時語不見空中書及茲
歲將闌感歎正躊躇祀先具薄奠撫已懷厥初觴酒豈
云乏獨酌悶難祛寧當解組去御子花間車

勉學詩

黃河西北來云是崑崙丘經行非一山田薄半九州上
有不測源下有無盡流萬化同此機不知幾春秋分明

天地心不為淺狹謀癡人用小計顛倒若無求安得申
韓氏化為古伊周

題王叔明墨竹為鄭叔度賦

吳下王蒙藝且文吳興趙公之外孫黃塵飄蕩今白髮
典刑遠矣風流存華亭朱芾稱善畫每觀蒙畫必歎詫
謂言妙處逼古人世俗相傳倍增價昔年夜到南屏山
高堂素壁五月寒壁間舉目見脩竹煙雨冥漠蛟龍蟠
呼童秉燭久不寐細看醉墨王蒙字固知蒙也好天趣
畫師豈解知其意分枝綴葉人所知要外枝葉求神奇
天機貴足不貴似此事不可傳諸師麟溪鄭君好奇士
愛画猶能賞其趣嗚呼世間作者非不多鄭君甚少可

奈何

蕨箕行

並海飢民千百數攜鉏上山斫山土蕨根已盡斫不休
力絕筋疲未言苦屋頭五日無炊煙十步九却行不前
全家性命係朝暮弱子假息阿母眠昨日斫蕨僅盈斗
今日蕨根不滿手但憑斫蕨保餘生再拜青山感恩厚
青山青山爾勿猜明朝未死攜鉏來

懿文皇太子輓詩

相宅圖方獻還宮疾遽侵鼎龜懸寶命笙鶴動哀音誰
紹三皇治徒傾四海心關中諸父老猶望翠華臨

題畫

得意支郎畫分明是米家亂雲浮雜樹遠渡卧枯槎白
屋孤舟迴丹崖一徑斜何時共漁叟洞口訪桃花

黃子澄一首

子澄初名湜以字行更字伯淵分宜人洪武乙
丑賜進士第三除編脩歷脩撰累官太常寺卿
兼翰林院學士靖難師入磔死

朱平涵云方練集已盛行惟太常文章泯滅單

詞片語流落人間氣
燄光華固不必多也

枯梅

百千年樹未全枯三五個花何太疎聞道石門春意動
不知曾有暗香無

詩話太常受易于歐陽貞受書于周與學受春秋于梁寅
初謁寅時寅令作枯梅詩立就甚異之石門寅所居也

練子寧 一首

子寧名安以字行號松月居士新淦人洪武乙丑賜進士第二人授翰林院脩撰陞副都御史工部侍郎建文時遷御史大夫靖難師入不屈死有金川玉屑集

徐子元云中丞玉屑無多為世所寶

詩話革除詩文之禁甚於元豐然遜志之集金川玉屑之編久而日星不滅也是編至正德中始出其詩娟秀妍雅七言如丹梯下壁龍蛇窟鐵鎖高懸虎豹關司馬豈無乘駟日終軍又是入關時旋沽南石橋邊酒走送東風江上船一水東來通漢沔諸峰西上接岷峨殘碑隨淚空秋草折戟沈沙自夕陽飲馬窟深泉脈暖射鵬風急雪花寒天垂鉅野河流急秋盡江南木葉疎莫怪風流謝安石未應憔悴沈休文皆冷然

可誦

三月望日與饒隱君子宏遊玉笥山謠

我懷謝康樂獨往遊名山身同雪舟繫心與浮雲閒清

風澹蕩灑六合令我興在雲松間玉山高與南斗齊雲錦照耀廬山低三十六峰凌虹霓飛湍噴雪臨迴溪長松挂月青猿啼上有梅仙采藥之幽棲下有蕭雲讀書之故基洞天石扇杳莫測瑶草謾長三春萋我欲因之覽八荒手拂青蘿眠石牀回飈吹散碧天霧清冥倒瀉澄湖光作為玉山謠寄之雙峰客興來攜妓秋復春笑殺東山謝安石

黃 觀 二首

觀字瀾伯一字尚賓貴池人初從父贅姓許洪武戊辰賜進士第一累官禮部右侍郎建文中改侍中掌尚寶司事奉詔募兵聞金川門師入

投李陽河死

題江貫道長江圖

離離衆樹深靄靄孤雲碧山色望難窮江流浩無極漁
歌遠渚昏鳥下平蕪夕惆悵涉風波扁舟何處客

送趙彥玘都事

石頭城下自分攜無復聯牀聽曉雞故里音書寒鴈杳
空江雲樹暮天低春來白下孤新約夢去花間憶舊題
猶念雪深留宿夜酒醒詩就小樓西

卓敬一首

敬字維恭瑞安人洪武戊辰進士除給事中歷
戶部侍郎靖難兵渡江被執不屈死宣德中廬

陵劉球得其遺文傳之

墨竹

洞庭木落水生波斜月虛窗露氣多虞帝不歸秋色晚
滿江煙雨泣湘娥

王叔英一首

叔英名元采以字行黃巖人洪武末為仙居教
諭陞漢陽知縣建文元年召為翰林脩撰靖難
師逼江奉詔募兵行至廣德自經於玄妙觀有
靜學齋臺

詩話先生令漢陽日遺書希直云凡人有天下之才固難能自用其才
者尤難如子房之於高祖能用其才者也賈誼之於文帝不能自用其
才者也天下之事固有行於古而亦可行於今者如夏時周冕之類是
也亦有行於古而難行於今者如井田封建之類是也可行者行之則

人之從之也易難行者行之則人之從之也難從之易則民樂其利從之難民斯受其惠矣此君子用世貴乎得時措之宜也可稱希直諍友
白首同歸不渝
霜雪古人哉

絕命詞

人生穹壤間忠孝貴克全嗟予事君父自省多過愆有志未及竟奇疾忽見纏意者造化神有命歸九泉嘗念夷與齊餓死首陽巔周粟豈不豐一作佳所見良獨偏高蹤邈難繼慎勿稱希賢

周是修一首

是修名德以字行泰和人洪武中舉明經由霍丘訓導歷周府紀善改衡府靖難兵渡江入應天府學自經死有芻蕘集

詩話紀善詩最傳者長安古意一篇李昉遠云可與初唐四子相埒近陳臥子論詩甚嚴選明三百年詩寥寥數卷是篇特見錄亡友陸麗京亦亟稱之云是神龍景雲以前風調子謂此等詩但似古人骸骨無關性情就芻蕘集中擇之不若牧童謠一首猶存張王遺韻也

牧童謠

遠牧牛朝出東溪溪上頭溪頭草短牛不住直過水南
芳草洲脫衣渡水隨牛去黃蘆颭颭風和雨老鴉亂啼
野羊走絕谷無人驚四顧寒藤枯木暮山蒼同伴相呼
歸又忙石稜割脚茅割耳身上無有乾衣裳却思昨日
西邊好曠坂平原盡豐草短蓑一臥午風輕長笛三吹
夕陽早

程本立 三十二首

本立字原道崇德人洪武丙辰以明經薦為秦

周二府引禮謫雲南馬龍他郎甸長官司吏目
建文初徵入翰林陞僉都御史靖難兵至自經
於應天府學有巽隱集

詩話建文諸臣文莫過方希直詩莫過程原道希直之文取法昌黎
下亦不失為蘇子瞻原道之詩刻意杜陵下亦不失為陳簡齋也

雪佛碑

天花陰墜空平地忽三尺異哉西方神現此水精域胎
非託摩耶意叵勞刻畫乃瞻白玉相安用黃金飾一洗
熱惱心悉依清淨力紅日起扶桑終焉化無跡其無本
非空其有亦非色我來鳳皇溪古寺久荆棘摩挲雪佛
碑碑斷字莫識金石亦已壞况非金石質萬事等幻影
感之三歎息

出洛陽城

輓輶上天津伊闕當我前連峰左右起奔走相後先古
來五嶽內嵩高極中天儀刑正四表襟帶流三川河山
固王室豈直金城堅漢業此中興周都竟東遷壯遊快
一覽遺跡悲千年頽垣舊誰築野蔓棲朝煙

題竹石小畫

玉堂仙人松雪公寫竹正似石室翁雲林道人雖後出
往往落筆生秋風吳人好書仍好畫百年遺墨千金價
比來何處得此圖松雪雲林此其亞娟娟嫩玉纔數莖
煙梢雨葉縱復橫洞庭寒骨沈水底鐵索下取蛟龍爭
却憶江南舊池館筆牀碁局何蕭散一行作吏事便廢

十年不歸夢欲斷松雪子孫今幾人
雲林弟子誰逼真
得歸故鄉儻相覓竹枝挂我頭上巾

銅梁縣

銅梁縣庭公事少銅梁縣市官橋小
山下山石作街
街南街北人家好人家好農不好商
婿男嫁女不出鄉
香芹煮羹飯有稻木棉紡絲衣有裳
陳郎邀我青樽滿
情多已覺迴鞭懶酒酣欲寫銅梁歌
百錢買筆紫羅管

題李典儀雲東卷

母老今猶健兒行久不歸
一官淹白首萬里夢斑衣
越郡東溟闊秦關西日微
只將雙淚眼日日看雲飛

許州東屯雜詩

三首

農功將築圃使者正行田
車過聞牛鐸詩成墮馬鞭
涼風蘋末起落日樹頭圓
翻憶吳淞岸菱歌處處船
死戰開邊土生還落野屯
時清無盜賊頭白有兒孫
春稻霜餘粒移桑雨後根
百年須飽煖此外復何言

丘園莽蕭瑟客子暮徘徊
山是釣州起河從鄭邑來
衣冠餘古墓歌舞只荒臺
野哭誰家婦秋聲助爾哀

過嶠甸始見禾泥蠻數家有
叟攜酒過水見土酋
飲道傍僕從皆飲酒盡乃行
有作

山斷邨纔見溪迴路忽迷
販茶非土獠勸酒是禾泥
碧樹排雲直青秧插水齊
欲忘鄉土念多事子規啼

晚至晉寧州

落日孤城小輕煙一水斜青山蒙氏嶮綠樹棘人家絕
塞無來鴈荒城有噪鴉多情此州尹勸酒說京華

寄弟并示壻

聞道南塘旱吾家正可憂不能供賦稅豈得免征求舊
宅荒苔雨先塋宿草秋急難須努力更與阿騏謀

乳石詩

有序

象賢奉常得異石于演樂堂典寶周翁識之云
道州乳石也奉常欣然以詩見遺因賦詩荅奉
常并呈長史且欲質諸典寶翁也

聞道山中乳窟多乳泉流出石為窠洞門到夜飛蝙蝠
驛路何年載橐駝野色忽看新崕嶺水痕猶認舊漩渦

豈無青髓香如飯老我黃塵奈爾何

使浙江發大梁水驛

蔡河雪消春水生使者發船將遠行得還鄉里雖慰意
却念妻子難為情草薶金谷樓前路潮打錢塘江上城
南北登臨總懷古船中有酒且須傾

高郵夜泊

城樓月色見觚稜城下官河夜欲冰返照疎林皆野燒
殘星別浦是船燈腐儒食祿曾無補倦客思家已不勝
春雨五湖煙水闊荷蓑歸去下魚罾

和貝惟學登小孤山韻

西來風浪湧金山人在鴻濛沆瀣間大地小孤天柱石

長江第一海門關
鮫人夜泣珠成淚
龍女晴梳翠作鬢
欲問靈巫報神語
我行何日定東還

喜晴

夜雨朝晴喜欲狂
西屯騎馬過東岡
不妨逐兔爭牽狗
切莫驅狼使牧羊
野日孤營無細柳
天風十月有枯桑
歸來又飲將軍酒
一醉都令世慮忘

過趙州

青山環抱水爭流
行盡雲州入趙州
四野耕耘多樂歲
諸蕃斥候不防秋
過橋花竹前邨近
入谷松蘿小寺幽
妻子誰能免相憶
他鄉雖好莫淹留

嵩盟九日次井泉百戶韻

天涯九日一登樓
應是黃花笑白頭
脫帽不妨同醉倒
拂衣安得不歸休
山盤晴谷深藏寺
水縮寒溪淺露洲
上馬荒城向昏黑
休教鼓角起邊愁

送魚課司使霍思誠赴京師

三年官守滯蠻荒
萬里羈魂度太行
居有馬羈留客坐
食無魚鮓寄親嘗
晴天梅樹常含霧
臘月山花不受霜
辭滿得歸人共樂
將詩送別意茫茫

送人致仕歸越

孝臣殊荷聖恩寬
詔許還家授散官
賜杖未攜鳩玉小
誥綾新織朵雲團
西窗夜雨銷紅蠟
東閣晴山擁画欄
了去我留寧不媿
鑑湖他日請黃冠

明詩總卷十六
十二
滇陽二月罌粟花盛開皆千葉紅者紫者白者微
紅者半紅者傅粉而紅者白膚而絳脣者丹衣而
素純者殷如染茜者一種具數色絕類麗春譜之
所云
鄩聞東風不作寒未囊花似夢中看珊瑚舊是王孫珎
瑪瑙猶疑內府盤嘶過驛驢金匱匝飛來蛺蝶玉闌干
瘴煙窟裏身今老春事傷心思萬端

晚至安寧

連然驛路馬曾諳落日行人思不堪地極九州銅柱北
山蟠六詔鐵橋南湯池水底皆陰火鹽井煙中半夕嵐
迴首蓬萊天萬里忍教塵鬢白毵毵

自姚安出普湖

層關飛鞚出寒雲萬木歸鴉亂夕曛山自蜻蛉川口合
路從鸚鵡嶺西分道傍築室新成市塞上屯田久駐軍
遠客誰無鄉土念悲笳吹動不堪聞

雀慶驛會吳人馮廣文閩人林稅使

馬蹄蹴徧陰厓雪直向居庸塞外行日落忽聞牛背笛
川平始見雀州城秋風千里萼絲滑暑雨三山荔子生
遷客相逢話鄉土天涯何限未歸情

送教授致仕歸金華

六十看山眼未昏草堂歸去臥煙邨朝廷已許乞骸骨
衣食未須憂子孫上馬天風吹蓆帽落帆江月到柴門

羹芹炙背區區意他日難忘獻至尊

早發祿豐驛

驛樓燈火見西屯使者出門人語喧天寒馬渡此溪水
月落雞鳴何處邨六詔山川皆郡縣百年身世任乾坤
若爲看見梅花發忽亂鄉愁入故園

鄧州驛

平岡走馬神摩洞荒驛聞雞鄧睽川丹壑洩雲朝翳日
玉泉陰火夜生煙一年殘曆愁來檢萬里新詩老去編
山水不殊人事異中原歸計正茫然

君山別業畫卷爲王伯昂題

畫圖林壑起雲煙使者高懷寄靜便背郭真成浣花屋
看山如坐洞庭船柴門黃葉鄰僧埽石徑蒼苔野鹿眠
如此故巢勞遠憶只應頭白是歸年

宿普安

漢婦良家子從軍歲月多生來小兒女唱得楚人歌

江頭絕句

小樹香櫟子疎籬扁豆花人情悲異土物色似吾家

揚州

揚州城下是官河春雨春風自綠波欲問繁華舊時事
太平遺老已無多

華陰駐馬橋

絕谷層關路屈盤斜岡側嶂石巒崦今朝駐馬橋頭立

華嶽三峰正面看

茅大方 一首

大方字希董泰興人洪武中為淮安府學教授擢秦府長史建文時官右副都御史靖難兵至死於難有希董集

詩話希董集流傳未廣集中如萬山入漢秦關險孤棧連雲蜀道難縱使火龍蟠地軸莫教鐵騎過天河花間鶯避春城仗林杪僧歸晚寺鐘萬里不來青鳥使千年空老碧桃花皆佳句也

塞門至銀州關道中

銀州西下忽都河降卒東來唱舊歌星散諸營連斥候雲屯萬里蔽沙陀自嗟出塞春光少誰道臨關月色多顧我鶴形非燕領立功萬里定如何

胡 閏 一首

閏字松友鄱陽人舉秀才授都督府都事進經歷建文中官右補闕陞大理少卿靖難師入不屈死

詩話長陵靖難受禍者莫慘於正學先生坐方黨死者相傳八百七十人其次黃太常坐累死者族子六十五人外戚三百八十人若胡大理之死郡志稱其族棄市者二百十七人坐累死者數千人妻斃於獄有把與狗喫了之旨載奉天刑賞錄不知何以若是慘毒有過於方黃者國史既沒其實不可得而詳矣大理少與吳存輩講業長沙王吳均祠中画一松於壁題曰蒼州出壑系之以詩太祖平陳友諒下饒州過而見之喜甚問得其名及舉秀才入見帝曰此題詩鄱陽廟壁者邪因令通籍不遺一善若此

題畫松

幽人無俗懷寫此蒼龍骨九天風雨來飛騰作神物

劉 璟 一首

環字仲璟青田人基次子授閣門使尋為谷王
府左長史靖難師入稱疾不起下詔獄自經死
有易齋無隱二集

詩話仲璟為伯溫仲子洪武辛未攜兄子應詣闕帝命其襲父爵仲璟謝曰有先兄臣璉之子應在不敢越禮乃設閣門使處之天台盧延綱稱其詩云酒酣落筆詞愈工命意不與常人同清如水甌玉盃貯蘇露和如大廷清廟鳴絲桐疾如黃河怒風卷濤浪麗如錦江秋水涵芙蓉

龜峰春意

振策陟龜峰極目散煩襟攀蘿越嶽巘
觀奇擁嶽峯氣和濯柔荑景淑悅鳴禽澹薄白日輝游漾輕雲陰予情亦何欲物理諒可尋芳菲三春意顛顛千年心持此較貞脆因之寄知音

高遜志八首

遜志字士敏蕭縣人徙居嘉興洪武初名脩元
史入翰林為編脩累遷侍講學士建文時加太
嘗寺少卿靖難後死永嘉山中有嗇菴遺藁

李時

遠云太嘗詩深純典雅成一家言詩話高季迪送唐處敬序云予世居吳北郭同里友善者惟王止仲一人十餘年來徐幼文自毗陵高士敏自河南唐處敬自會稽余唐卿自永嘉張來儀自潯陽各以故來居吳而皆與予鄰於是北郭之文物遂盛矣是北郭十友其初士敏處敬與焉其後徙居橋李是以季迪懷十友詩不及也太嘗之死傳聞異辭革除遺事及吾學編皆云靖難師起存沒無攷劉琳拊膝錄謂盛庸兵敗自經柳琰嘉興府志謂卒于官趙太守瀛撰嘉興圖紀稱太嘗卒謚文忠彭比部輅亦云未知何據亡友蔣之翹楚禪嘗出其族譜有遠祖兢仕讓皇帝為文淵閣侍書實太嘗弟子有祭太嘗文其略云歲在壬午九月晦吾師士敏高先生卒師以國破家亡遁影東甌鴈蕩山中頽齡疾苦僕從竄逸隻影自矢為西山餓夫天假之合小子兢亦以未死之身來偷息於此相對若夢寐淚涔涔下侍吾師厯五十日吾師竟長逝就瞑之頃指畫恨字既而曰復何

恨復何恨者正吾師泣血椎心萬古耿耿之長恨也競窮塗無以成禮
林有巨木遭伐其腹枵然乞諸樵叟斂而葬之芙蓉峰北嗚呼天降喪
亂蕭牆禍起君國殄瘁臣所當死博浪無椎環柱失七遁跡空山潔身
以竅避詎之間師師弟弟命之窮子師疾不起為營一坏山崖水涘杖
履莫追涕泗曷已然則金川門師入之後太嘗自潔其身遠避未嘗卒
于官其詩有云生死尚無懼寵辱何足驚蓋矢之有素矣列朝詩集據
崔林集云太嘗作周尊師傳後題洪武三十五年歲次壬午春正月初
吉前吏部侍郎太史河南高遜志又祈雨詩後書云河南高遜志大明
洪武吏部侍郎因疑革除之後不署建文職官故稱洪武第壬午正月
靖難師尚未渡江讓皇帝猶在位豈有預書洪武三十五年之事乎致
革除之命是年七月始下則二書題名蓋出於道士未足依
據也當菴遺臺詩文各一卷太嘗十世孫佑鈺博采成編

兵後南湖宴集分韻得可字

皇風邁中否微命亦遷播豈謂託喬林依然駭烽火前
年奔山壑去年匿檣舵妻兒怖欲死崩憂不知我賴此
干城將揮戈挽日隨趙佗既稱王天子詔曰可人能閉
殺機三光自寧妥湖波瑩宵鑑芙蓉顫秋朵且共醉明

月狂吟莫還舸

答徐以文

金俊民云以文各用章上虞人有詩見魏仲遠敦文集或刻作徐幼文誤也

我本不羈士少年慕遠遊結交盡豪俠英風邈難儔浩
然志四海壟斷非所求羣雄亂天紀誓將除國讎驅馬
向京邑道路阻且脩曠望空歎息失計成淹留時哉苟
未會白璧寧暗投恥同五鼎食笑視千金裘素絲尚游
俠枚臯事俳優知己竟不遇行藏誰與謀芳時忽徂謝
冉冉春復秋人生久羈旅豈不懷故丘放歌吳門市洗
耳長江流雖然不得意嘗為蒼生憂心隨去鴈遠目送
孤雲愁夫子經世士雖賢不見收何如共脫屣速駕凌
滄洲

題燕文貴秋山蕭寺圖

野性樂山水，塵居違素心。蕭然困疲役，胡能遂幽尋。恒思愜所適，勝槩恣登臨。秋清景尤曠，蒼翠列遙岑。霜餘委蔓草，孤秀愛雲林。畸人寡諧俗，結宇丹崖陰。浮念不煩遣，寂寞契冲襟。况復邇蕭寺，禪誦有遺音。簞瓢足自老，簪組知難任。披圖憶所歷，閱歲茲已深。景物匪殊昔，但傷華髮侵。何當脫塵躅，歸休期自今。

燕穆之楚江秋曉圖

曨曨曙光啓，渺渺楓江白。天空爽氣清，露滴千峰碧。微茫雲夢渚，迢遞潯陽宅。五柳高且疎，涼風起蕭瑟。河漢縱復橫，分明見秋色。翩然鶴夢醒，孤舟正攜客。

適興

神理固莫測，闔闢無時停。萬物盈兩間，森然咸委形。榮悴從大化，胡為勞其生。悠悠念往時，飛空如流星。先哲邈難逮，撫已空無成。嚴霜被中園，蔓草猶青青。晨夕自游目，亦足陶吾情。

龍江紀事

避地龍江上，扁舟似杜陵。流離心欲折，漂泊力難勝。水落橫魚罟，林疎見寺燈。窮塗何所託，猶喜耦良朋。

題盧元佐所藏江山圖

結茆曾住白雲間，游宦多年客未還。開卷偶然鄉思動，數峰渾似鄂州山。

題陶淵明像

玉山頽矣葛巾偏老僕扶持步不前莫道先生渾不醒
醉中猶記義熙年

蔣 兢 一首

兢字維敬自宜興徙嘉興建文初舉人才授文

淵閣待書

詩話建文諸臣自吾學編名山藏副書史待史竊史槩而外黃佐有革除遺事高壁有幽光錄素祥有建文私紀陳洪謨有革除編年許相卿有革朝志陸時中有建文逸史姜清有秘史王會有野史素聚有奉天刑賞錄劉琳有附膝錄屠叔方有朝野彙編宋端儀有革除錄朱睦㮮有遜國紀林塾有革除史補郁襄有革除遺忠錄杜思有革朝遺忠錄鄭應旂有革朝遺忠列傳張朝瑞有忠節錄汝設徐即登有建文諸臣錄焦竑有遜國忠節錄汪宗伊有表忠錄趙士喆有建文年譜趙啓元有遜國續鈔錢士升有遜國逸書陳仁錫有壬午書朱鷺有建文書法擬劉廷鑾有遜國之際月表曹參芳有遜國正氣紀周鑣有遜國忠紀周遠令有讓皇帝本紀高世豐有盡心錄以及奉天靖難記建文事迹建

文君臣逸事革除漫錄革除紀遺遜國臣紀羣忠事略就義編紀述者不為不多矣然類皆惑於從亡致身二錄舉凡河西傭東湖樵夫雪菴僧補鍋匠一一以姓名實之而吾鄉若姚侍御瑄以姦黨誅籍見成祖實錄顧諸書反不及焉又北平所司州縣官以靖難師起棄職遠避有朱寧等二百一十九人寧亦未有登載者至於侍書之葬其師則諸公所未及知也予嘗面請學使者以程公本立姚公瑄楊公任高公遜志建四忠祠於嘉興而以侍書配食於高公之右學使者諾而不果行也世有主持風教者表忠之典冀吾黨君子留意焉

長相思

長相思江悠悠洞庭木落三湘秋夢中不識別時路九
疑雲黯蒼梧樹翠華南去不復還雙蛾灑淚愁空山五
十哀絃雛鳳語鷓鴣啼處斑斑雨長相思思轉深請以
白玉璞琢出相思心三湘之深東入海相思之心終不
改

鄭 桓 五首

桓字居貞歙人洪武中舉明經官至河南左參政永樂初坐方黨死有閩南關隴歸來檜庭諸

稟

詩話侯城取友於林公輔鄭居貞最親故其詩云雄文不見林公輔病眼荒荒何處開又云每懷樛散鄭司戶喜看杞梓作孫枝又云林鄭為文學我家波瀾議論闊無涯又送居貞入成都詩云兩生萬里來講道慰寂寞寧知事多忤重使欲離索林也前歲歸重來忘曩約鄭子今復去南行踰巖夢疑經待同勘蕪史期共削相須左右肱理勢不可各金門盛才彥德星耀井絡翩翩白鳳羣豈復少一鶴蓋居貞有翩翩紫鳳雛一篇贈侯城行故答及之也遺意詩云相對靡俗言共譚止書詩遐情或深契歡笑同解頤於心有至樂天地亦可遺贈別詩云丈夫平生懷豈惟安其身則以古道相勗矣侯城遇林鄭殆弟子而兼朋友者居貞坐方黨死於南京其餘弟子未至作瓜蔓抄也鄭詩傳者無幾林尤罕見曩在都日梁溪顧梁汾典籍得其手抄文集塗乙尚存尋歸之崐山徐氏傳是樓惜未及騰其副至今耿耿於懷侯城高弟惟王叔豐最傳誦集中感舊詩有云杯酒論心有幾人天台張穀舊相親精通八法楊文遇暗誦五經陳用中立言溫粹懷陳采肆筆縱橫憶鮑岡寫懷有云伯尚庭前傾竹葉用中宅畔看梅花假有好事者為之著錄以之配食於木木祠中亦勝舉也

植檜

有序

河南政府有古檜十四株蒼翠特立有古君子之操焉其一勢日偃側懼其久而益敝也乃啓其培而扶植之噫孰謂人心之偏不可正邪詩以詠之

鬱鬱堂前檜清陰 比長廊靈根蟠厚地直榦凌穹蒼雨露相沫濡雲氣時飛揚如何一敬側衆中不成行爾性本孤直胡為若徬徨得非失培護毋乃風雨傷一朝為扶植老氣猶昂藏矯矯蚪龍逸翩翩鸞鳳翔物性尚可治人心寧自戕凌霄聳高節歲寒矢弗忘大哉棟梁具期爾薦明堂

洪武癸亥春以公事出會寧北境四首

答納城邊春水生百花原上骨縱橫荒郊露宿不成寐
一夜大風吹到明

雪山高聳入青雲下有黃河一帶分粉堞數家高作塞
黃羊十百動成羣

沙蔥野韭隨時采蘆酒黃牛取次嘗萬里驅馳關塞外
忽驚風物憶江鄉

荒原人家今少存好田多是官軍屯前山遙見黑城子
渴飲不知河水渾

林右一首

右字公輔臨海人洪武間中書舍人進春坊大

學士輔導皇太孫以事謫中都教授挂冠歸有

林公輔集

題植芳堂

雅心慕幽潔蒔芳此堂陰端居寡俗好庶得觀物心苑
彼徑寸苗弱質恐不任靈雨及時降春榮萋以森晨興
荷吾鉏逍遙步前林俟時冀采采敢使蕪穢侵靈均世
云遠高蹤邈難尋興言遺遠者媿匪瑤華音

葉見泰一首

見泰字夷仲臨海人刑部主事有蘭莊集

詩話夷仲侯城之友其贈侯城詩云我友方濟寧有子字希直而侯城
集中有祭葉主事文云昔我先公與公最懽我為童穉輒觀公文謂公
名人非我敢見乃辱愛知不我愚賤譽我勉我待以友朋再薦而起實
忝同徵舟行千里連牀接膝飛觴賦詩樂意橫溢蓋論交在紀羣之間

也者

蘭莊

霜風薄林泉衡門迹如埽賴有楚畹花相看慰幽抱芬芳發懷袖落日思遠道遠道不可遺歲晏徒自好

許繼一首

繼字士脩寧海人洪武中台州儒學訓導有觀

樂生集

方希直云士脩詩清雅俊潔出乎天趣詞修而不浮意凝而不窒言暢而言深高妙處有魏晉人格韻非近世詩人所及詩話士脩自號觀樂生賦詩九章其言曰天地間物物可樂也况垂象成形之大者乎塵土憂勞亦人自為耳靜以觀之取其寓於目而樂於心者為觀樂九詠九者何青天也白雲也初日也霽月也丹霞也滄海也遠山也澄淵也古書也侯城為之作傳其卒也又為之作銘稱為篤志尚德之友而曰君言必出乎正動必出乎禮趨舍取子威則乎古之君子而無所苟其精思學力以求道德性命之蘊汲汲若或失之而有得乎心沛然以樂不以貧賤患難惑其志子取友二十年所交海內知名之士甚眾考其所存莫有類吾士脩者其心悅而推服之若是士脩夜

坐詩云不意片楮間乃見古人心自道詩云聖言久彌宣有求即可得皆守道之言也

述懷寄脩德

昔遊登四明回望天台峰蒼茫見遠色積翠浮遙空維時凝雪霽萬里來天風想像瓊臺觀杳在丹崖中真源隔迷塗曠絕不可通煙蘿冷秋月夜雨鳴梧桐夢寐發幽感徒嗟塵累蒙王子吹笙侶高情亮誰同清言契夙心奮策得所從振衣石梁上思躡飛仙蹤佳游復我愆有懷鬱忡忡猶憐雙飛鶴來候巖前松

郭鈺一首

鈺字景南營國第八子贈定襄伯

詩話景南最為方正學所器有對雨寄正學詩云小齋頗幽僻窗扉亦豐敞新槐檐上綠細草階下長寂無人事喧但愛雨聲響緬思同心人

吟懷共清賞亦
復具韋左司體

夜坐

庭虛初月上樹響微風入棲鵲聽猶驚流螢隨還拾沈
沈寒漏緩隱隱餘鐘急坐久不知疲衣涼露吹濕

王 紳一首

紳字仲縉義烏人待制禕之子宮國子博士有

繼志齋集

題墨竹

瀟湘江上暮雲迷落日無人翠羽低
一蓬春雨鷓鴣啼

唐之淳 六首

之淳字愚士以字行紹興山陰人應奉肅之子

建文初用薦為翰林侍讀有萍居橐

王元美云侍讀清麗足稱奕世

之美 錢受之云侍讀為李景隆子師數從景隆徧歷燕薊周秦名都故跡酒酣以往作為歌詩高詠擊節其詩尤雄雋而今多不傳可惜也詩話萍居亦正學好友正學稱其孝行謂君父應奉謫死臨濠君辛勤跋履奉喪歸葬追求父平生題詠荒郵敗壁高崖斷石之間纂錄收拾如獲金壁時時伏讀凄切動人然則應奉所存丹崖集皆出其子所緝也建文三年命舉文學之士撰鑑戒錄正學實薦之名至即拜侍讀同事纂脩是年閏月即病死元津街官舍蓋正學之友若夷仲士脩仲縉皆先正學而亡故皆不及於黨禍也萍居詩流傳特寡聞松陵一故家有鈔本巫往購之已轉付新安質庫不可得矣

禹廟

昔在帝堯時洪水滔天流鯀功既不竟微禹吾其憂禹
敷下土方乃至南州維南有會稽玉帛朝諸侯少康
封庶子衣冠闕山丘遂令築祠宮俎豆巖之幽云何末

代下有穴肆探求明明太史公秉筆欺吾儔豈知大聖
人天地同去留厥言在洪範箕子授成周衣裳食息際
莫匪蒙靈麻皇皇古叢祠祀典明且脩空梁詭龍變亦
足為神羞

秦望山

秦鹿未云失龍駕此遐巡茫茫三神山虎視欲來賓時
維四海內孰不讎狂秦睽睽千萬目相顧不及晨尚采
不死藥樓船訪仙真意欲世無儒一身當萬春遂令徐
福輩奔走空辛勤有之諒莫至况乃無其人茲山幾春
秋草木被音塵上有李斯碑磨滅無復存下有神禹陵
注氣日氤氳過者同歎息仁暴固殊倫

柯亭

蔡子橫笛處名存音則亡常時亭上人念此一慨慷悄
然官塗迴雜樹夾疎篁先秋氣已襲颯爽若含霜漁樵
夜各歸月出斗有芒微雲翳河漢龍火干正陽狐狸草
中號熠燿又宵行龜亡鳳不至何以慰軒皇我有嶰竹
枝頗復諧宮商藏之五百秋正氣慘不揚天地所愛惜
神人共嗟傷恒願起九泉從子返虞唐

嚴子陵墓

昊天厭新亂炎劉噓復然天子吾故人不事何其賢維
此一坏土體魄之所存清風激巖谷勁氣出蕭蘭中有
高空雲日夕相盤旋化為千尺蚪下飲清泠淵為霖既

靡試翻身入長煙我見重再拜毛髮凜沖冠緬懷東京
日惕然思執鞭

石鼓詩

有序

洪武丁卯秋九月余在燕城觀石鼓因賦四十
韻已巳三月鄉友趙撫謙氏持墨本來京師俾

余錄諸卷尾

郡學舊辟雍中有岐陽鼓古今所聞十左右各惟五離
離大星隕兀兀壞雲補纍纍營窳滅落落陳沙聚質若
切玄玉制若覆冷釜氣若鎔五金文若斷釵股孤峰割
秋瘦千葩耀春嫵森嚴列戈矛爾雅冠章甫崖水溜靜
懸海暖浪掀舞摧軒半折軸敗舫或遺舫小龍彭蠡歸

大鵬扶搖舉斷苔明碎錦古墨漬潤礎思昔委秦郊雷
電驚草莽來牛礪其角鑿白加以杵幸今依黌宮星日
照廊廡圭壁遜其儀俎豆與之伍脫非天意憐或是神
明祐深檐白晝永老屋翔鸞翥晴連畫戟陰冷濕宮牆
雨諸生獲講解髦士資訓詁啓鑰煩豎閣搨本利商賈
韋辭表姬周韓語懷李杜雄章迭鏗鉤遺恨寄酸楚紛
紜歐蘇作詰屈薛鄭譜稱評雖靡定仿像詎非古鯁生
千載下匏繫三江滸神徒馳周南足不出城府適從遼
碣役遂作幽燕旅平生慕奇聞一日獲嘉覩初臨色愈
莊欲狎氣斯沮如親至東都揖讓申與甫如親與田獵
搏攫兕與虎如虛藜覓腹烹太牢肥羜如洗蜩蟬耳聆

笙磬祝啟羈愁破昏憎喜氣浹省宇時維躔壽星歲甲
在疆圍天寒號鷓臬城荒茂禾黍宗周本余懷覽古亦
天與摩挲重圖訓蹙縮媿庠序聊陳曹鄴風式繼韓韋
武

和荅孟熙見寄之作

少小承家學荏苒閱三紀譬之田舍兒所習惟耒耜力
耕不逢年餒也亦足恥朝英既已萎夕秀曷可恃忽枉
同志人妍辭寄深旨展誦累宿昔反覆悲復喜達生固
通人俟命則君子為山由簣升斲車自輪始勉矣期共
臻報德媿無侶

袁 凱 十九首

凱字景文松江華亭人洪武中徵拜御史以病

免歸有在野集

張汝弼云景文渾厚含蓄遠逼盛唐 李賓之云凱詩專學杜 陸子淵云海叟詩國初未見其

比 李獻吉云海叟師法子美集中詩白燕最下最傳諸高者頗不傳何仲默云我朝諸名家集多不稱鄙意獨海叟較長叟歌行法杜古作不盡是要其取法必自漢魏以來者蓋具體而未大耳 徐子元云景文師法少陵格調高雅奚止白燕 莫子良云景文志窮騷雅力挽頽靡詩非少陵勿道是乃得其髓不獨咀其華領其神不獨標其格讀在野集寥寥數簡令人有一唱三歎之思焉 王元美云素景文如師手鳴琴流麗有情高山尚遠 胡元瑞云仲默於國初詩特推海叟其詩氣骨出高楊上才情勿如也 何元朗云素景文古詩學選近體宗杜格調最正 顧玄言云景文才情迢拔往往有奇語 俞汝成云誦海叟詩知為恬澹先幾之士 蔣仲舒云景文如兒鷹試風雖未長成已自縱快又云雖未登大雅之堂寔已起宋人之乘 程孟陽云海叟詩氣骨高妙絕去雕飾天然道貌即之泠然自宋元來學杜未有如叟之自然者 陳卧子云海叟亦能作俊語 李舒章云海叟如三吳解事子弟頗有游涉未登堂奧 宋轅文云景文秀不及李迪健不及伯温而體格莊雅時見逸思故獨為仲默所推許

詩話媿堆子斥楊鐵崖為文妖惟詩亦然雖才情橫逸而習氣太深浴其派者高則温岐李賀下或雜以宋詞元曲孟載子高皆所不免獨海

史純以清空之調行之洵不易得然合諸體觀之則不及季迪伯温尚遠何仲默推為國初之冠似非篤論也世傳海叟賦楊白花有讒之者曰欲種楊樹於深宮將蒔花萼於何地海叟聞之遂伴狂騎烏捷杖木笛行九峰三泖間徵典郡校不起對使者歌月兒高一曲是又河西傭補鍋匠之亞矣海叟居松江府治東門外崇禎末單麻城恂即其址構白燕菴李舍人待問書聯於柱云春風燕子依然入大海鰻魚不可尋相傳孝陵有言東海走却大鰻魚何處尋得為海叟而發也恂字捐菴庚辰進士以詩文名待問字存我癸未進士精書法死於難

楊白花

楊白花飛入深宮裏宛轉房櫳間誰能復禁爾胡為高
飛渡江水江水在天涯楊花去不歸安得楊花作楊樹
種向深宮飛不去

陳臥子云感慨深長

書北山精舍壁

夙昔慕幽曠中年值奔走及茲始知返顧已成皓首茲
為山水選風氣固深厚萃萃律皆嘯粵縣邈盡林藪清泉

瀉幽磴白雪被層阜既多緇錫流况有耕釣叟初心已
云協雅言得兼受始來疎梅隨復此山櫻剖庶幾去日
遲誰謂行當久揮手謝朋侶吾將寄衰朽

陳臥子云清整之作其源出於王粲

馬氏西園宴別吳進士善卿

竹陰連水屋荷氣集池臺南國佳人在西園高宴開好
風因樹起新月度河來別後江潭上離腸日九迴

送李高士歸荊州

南京高宴罷西土遂言歸江路猶殘雨荆門正落暉蓬
生仲蔚宅秋入老萊衣明發思君處蕭條鴻鴈飛

送任李二高士歸越

老去任公子重來李少君仙凡初不遠江海自離羣水

遶吳宮樹山連禹穴雲汀州有長笛日暮不堪聞

邨居懷京下一二友生

罷職非能吏歸田即老農有詩聊度日無字可書空白
髮將誰念黃梁且自春故交能問訊家在五湖東

思歸簡嚴八

天高風正急鴻鴈傷人飛江外無來使淮南盡擣衣悲
歌聊當泣遠望亦同歸為報嚴夫子滄洲與願違

春園

春園江水上江霧日昏昏沙暖長垂釣花深不閉門家
童鉏隴麥野客共盤餐衰老仍耽酒經年嬾出邨

懷王道士

宣城王道士愛著芰荷衣一自清江別三年白鴈飛酒
徒隨處有冗客向來稀最憶青城夜狂歌不肯歸

登浦上閣

高閣春波上登臨獨愴然故鄉從此去久客未言旋花
好誰家屋帆輕何郡船朝來有微雨應灑郭西田

泗上書懷

為客山川遠封侯歲月遲後生方爾汝吾輩復驅馳豈
是逢迎倦深知氣力衰還將歸老意先報海鷗知

客中除夜

今夕為何夕他鄉說故鄉看人兒女大為客歲年長戎
馬無休歇關山正渺茫一杯柏葉酒未敵淚千行

京師得家書

江水一千里家書十五行行行無別語只道早還鄉

無題

門外青青草今年更覺深前時玉釵墮侍婢不能尋

淮西夜坐

蕭蕭風雨滿關河酒盡西樓聽鴈過莫怪行人頭白盡
異鄉秋色不勝多吳明卿云悲惋欲涕

客中夜坐

落葉蕭蕭江水長故園歸路更茫茫一聲新鴈三更雨
何處行人不斷腸

淮東逢張十二信

少年追逐共西東吳邁文章馬亮弓一自干戈零落後

白頭淮海獨相逢

李時遠云唐調程孟陽云似乎率易然是老杜法脈李舒章云似乎美存沒口號朱子蓉云學杜不當

如是邪

寄三江王六秀才

滄洲荷屋晚秋時橘柚青黃滿戶垂安得扁舟趁潮去

醉看江雨散輕絲

題蘇李泣別圖

上林木落鴈南飛萬里蕭條使節歸猶有交情兩行淚

西風吹上漢臣衣

王元美云頗見風雅李時遠云鎔詞鑄意妙絕無比陳卧子云不減李益

漏 瑜一首

瑜字叔瑜一字大美別號越南會稽人革除間

河南道監察御史有石軒集

張園貞云大美寓居烏墩烏青九老其一也

詩話侍御潛迹江湖締交者舊宣德中在烏墩為九老之會時趙曦伯高年九十一吳煥汝文年九十趙岐伯通年八十九孫孟吉兆禎唐其諒年八十五水宗達朝宗年八十二叔瑜與壺敏中行錢郁耀字年皆八十餘時人有詩紀其事云景迫桑榆盡日閒更邀同志效香山尋常樽酒頻酬勸適意林泉任往還心遠自忘塵世事年來不鎖利名關莫言九老非前比養得天和總一般流傳以為佳話曦宋安定郡王後洪武中官儀鑾司序班岐安康郡王後孟吉革除間太嘗博士其諒革除間以文史院出署天長丞郁湖廣石門知縣曦煥孟吉敏皆烏墩人岐青鎮人宗達吳江人其諒鳳陽人郁臨安人敏好乘舟玩水時號浮瀾先生著有竹松集煥有怡安集烏墩一曰烏成亦曰烏鎮又曰烏陀青鎮即青墩也萬曆中扶溝何出光撰蘭臺法鑿錄凡任御史者書其名系獨不載叔瑜殆以革除間任舊籍去之故爾

明妃怨

萬里黃雲塞草枯琵琶無語月明孤玉關回望將軍寨
錦帳氍毹夜博盧

龔

調二首

詡字大章崑山人父訔洪武給事中戊五開死
勾詡補伍守金川門靖難師入變姓名王大章
遁歸更二十餘年禁稍解賣藥授徒周忱撫江
南薦為學官不赴既卒門人私謚曰安節先生
有野古集

為彥中題畫

青山之青如佛頭白雲化作寒泉流世間塵土飛不到
眼中景物俱清幽若人自是好靜者豈非五柳先生儔
每託琴尊寫高興脫屣樂從魚鳥游却笑時人苦不達
漏盡鳴鐘猶未休君不見小虞塘西玉峰下一菴已遂
吾菟裘共論心事肯相過斗酒當為山妻謀

竹枝歌

朝見浮雲飛出山暮見浮雲飛入山浮雲自是無心物
郎既有心何不還

魏 澤一首

澤字彥恩溧水人刑部尚書靖難後謫寧海典

史 錢受之云彥恩錄方博士家時藏其幼子以故方氏不絕謝方石詩所謂孫枝一葉是君恩者是也

過侯城里

筍輿衝雨過侯城撫景悽然感慨生黃鳥向人空百轉
清猿隨淚只三聲山中自可全高節天下難居是盛名
却憶令威千載後重歸華表不勝情

袁敬所一首

敬所不知其名靖難後流寓常山之松嶺酒酣
書五柳圖詩擲筆悲吟繼以濺淚有江右布商
見之曰此吾鄉某編脩何為在此敬所趨掩其
口不顧而去

題淵明五柳圖

藜杖芒屨白布裘山中甲子自春秋呼兒點檢門前柳
莫遣飛花過石頭

明詩綜卷十六

明詩綜卷十七

小長蘆 朱彝尊 錄

錫山 秦實然 緝評

姚廣孝 四首

廣孝長洲人幼名天禧既為僧名道衍字斯道
洪武中以高僧應選侍燕邸永樂初論靖難功
為僧錄左善世加太子少師復姓賜今名卒贈

榮國公謚恭靖有逃虛子集

高季迪云衍公詩險易竝
陳濃淡迭顯能兼采眾家

不事拘挾 俞汝成云少師詩縱淺近宜傳 顧玄言云恭靖性空思
之心寂語新惠休法振不得專譽禪藻 蔣仲舒云少師棲遁禪宗中
嬰世網既參佐命卒叛初服互進儒釋之間未獲進退之所
其詩如切利天雖自快樂未就解脫魔障既深終當墮落
靜志居詩話少師與高僧同徵當時孝陵知人則哲何不移來復之
誅誅之致前代桑門得預軍謀者若佛圖澄道安鳩摩羅什支曇猛竺

朗皆非盛世之事少師獨早著才稱晚參帷幄文與北郭十友之林武
居靖難諸臣之首咄咄怪事觀其入燕兩謁劉太保墓賦詩云良驥色
同羣至人迹混俗知已苟不遇終世不怨讎偉哉藏春公筆瓢樂巖谷
一朝風雲會君臣自心腹大業計已成勛名照簡牘身退即長往川流
去無復佳城百年後何人敢樵牧斯人不
可作再拜還一哭蓋早以藏春子自况矣

荅楊孟載

棲棲泊城南春深抱幽獨餘花猶綴紅衆樹已滋綠茲
因塵內居始憶山中屋何時陪騎游吟看舊題竹

送友人之松江

潮來沙磧平月落海門曙汀蒲轉風葉堤柳搖煙絮江
頭春可憐天涯人獨去有歌送君行無酒留君住雪浪
沒沙鷗雲帆出江樹回首讀書堆青山不知處

題秋寺晚晴圖

援將朔吹哀雲帶溪流駛相送獨歸僧蕭蕭夕陽寺

秋蝶

粉態凋殘抱恨長此心應是怯淒涼如何不管身憔悴
猶戀黃花雨後香

解 縉 三首

縉字大紳吉水人洪武戊辰進士試中書庶吉
士尋除御史謫河州衛吏旋待詔翰林永樂初
進侍讀學士直文淵閣預機務逾年進翰林學
士出為廣西參議改交趾入奏事會太宗北征
見東宮辭去為高煦所譖徵下獄命獄吏沃以
燒酒薶雪中死有春雨齋集

楊東里云大紳詩豪宕豐
贍頗似李杜 黃廷臣云

學士古體詩入太白集中孰別其為近時之作 蔡翔云先生詩豪縱
放逸一自胸中流出辭之長江大河一瀉千里覽者為之心驚目駭
李賓之云學士才名絕世詩無全豪傳者真偽相半頓令觀者有極落
吳江之歎 廖玄素云學士興會所到肆意成章水搏蛟蚪陸刺犀象
淵乎其不窮浩乎其有餘高皇智屈羣策親如善長貴如廣洋惟庸近
侍如安如謙如觀如素雷霆所擊罔不震懾學士以一少年萬言批鱗
靡所忌諱而聖度優容令其進學才難之歎猶可想見也 徐子元云
大紳獨駕青鸞翱翔八極使謫仙遇之當懸榻以待 王元美云解大
紳如河朔大俠鬚鬚戟張與之周旋酒食偕父 俞汝成云解學士才
冠一時積學尤富發為詩文宜無與敵乃多率意遣辭不事磨鍊若信
筆游戲者然蓋在國初風會習尚使然也 穆敬甫云解詩如塵起朱
輪風生綠幘乃詩中貴游也 李時遠云學士天質甚美詞鋒甚銳但
少溫厚和平之氣 錢受之云學士才名烜赫傾動海內俗儒小夫闢
言長語委巷流傳皆為藉口今其集存者出自後人掇拾往往潦草牽
率不經意匠巧遲拙速遂令學
士蒙謫千古則後死者之過也

詩話明初詩傳者多失真如楊廉夫題鍾山作此吾鄉朱山人純詩也
解學士題虎顧衆彪圖則又廉夫之詩也乃說詩者謂太宗幾欲廢嫡
見詩而止傳會之言殊堪發笑學士詩敏捷不大推敲其言曰寧為有
瑕玉莫作無瑕石其立意固如是矣然就近體而論如細雨乍過西掖
樹熏風遙聽上林鶯青山拍拍風沙滿紅葉蕭蕭浦樹稀三千歲後桃
花老二十四橋秋水通天連銅柱蠻烟黑地接珠厓海氣黃粵女豔妝
爭半髮 徭人村鼓共鳴銅青山遠道遙相送画舫中流獨日歸千家竹
屋臨沙嘴萬斛江船下石頭未嘗不符作者亦何至叫踈隳突若世所
傳詠物諸詩衆惡皆歸皆由敏捷台之乃知騷衷以
迅驟為主鷹隼以輕疾為妙張純之言大非篤論

彭澤

青山圍一縣隱隱見人家亂石邊江出孤帆帶日斜翠
添官舍柳香泛驛樓花不見陶彭澤湓城起暮鴉

寄黃玄齋

來時蕭峽駐輕舟惆悵初年作遠遊夢裏相思不相見
武功山下月輪秋

龍州

波羅蜜樹滿城圍銅鼓聲喧晝賽神黃帽葛衣墟市客
青裙錦帶冶游人

楊士奇

十七首

士奇名寓以字行泰和人建文時以辟召入翰
林永樂初改編修入直文淵閣累官少師華蓋
殿大學士贈太師謚文貞有沙羨石臺東里諸

集

楊弘濟云東里歌頌太平未嘗不致儆戒之意至於觸物起興亦莫不各極其趣體製音響皆發乎性情非求之工巧者比李賓

之云文貞學杜間得魏晉遺意徐子元云東里格調清純實開西涯之派王元美云楊東里如流水平橋粗成小致胡元瑞云楊文貞

文敏胡文穆金文靖皆大臣有篇什者頗以位遇掩之詩體實平正可觀蔣仲舒云少師韻語妥協聲度和平如潦倒書生雖酬酢雅馴無

復生氣錢受之云東里辭氣安閒首尾傳德不尚藻辭不矜麗句太平宰相之風度可以想見以詞章取之則未矣

詩話東里優游按行諸體皆蘊藉可觀其自序云古之善詩者粹然一出於正用之鄉閭邦國皆有裨於世道夫詩志之所發也三代公卿大夫下至閨門女子皆有作以言其志而其言可傳余早未聞道既溺於

俗好又往往不得已而應人之求即其志之所存者無幾也亦可謂能自訟矣

送尤文度歸吳中

我友整遐裝誓將起旋歸平明發城邑率彼東路馳爰
與二三子祖餞臨郊岐中觴趣分袂恨恨使我悲嚶鳴
求其友竊慕伐木詩平生攜手好何為中仳離行當阻
川岫安得睹光儀情敦思苦深久要諒不遺各言崇令
德庶保黃髮期

漢江夜泛

汎舟入玄夜奄忽越江干員景頽西林列宿粲以緜凝
霜飛水裔回颺蕩微瀾孤鴻從北來哀鳴出雲間時遷
物屢變游子殊未還短褐不掩脛歲暮多苦寒悠悠念
行邁慊慊懷所歡豈不固時命苦辛誠獨難感彼式微

詩喟然興長歎

李舒章云楚楚自好不失選體

同蔡尚遠尤文度朱仲禮楊仲舉蔡用嚴游東山
步出城東門遙望雲巘累月懷佳遊茲晨遂登踐梵
宇繞層阿飛樓凌絕峴方塘涵湛碧喬林茂敷衍繁翳
幽莫通丰茸紛不剪攀磴窮高躋緣逕屢回轉是時微
雨收輕霞澹舒卷睇遙素橫川俯夷綠盈畎陟降體自
便顧睇心已緬况接曠士言復偶釋子辯析空理弗味
違喧抱逾展何因此間棲永令浮慮遣

永豐曾氏龍潭

開軒面澄潭潭水綠於染其下蟠蛟蚪四時興有滄嘉
樹羅蔥蒨煙霞互舒歛晴漪漾春牖涼颺含暑簟俗轍

謝經過書卷恒不掩探微心有得行素道無歉消搖視
天宇油雲馳冉冉庶跂沂上樂誰當歎與點

題劉逸人樂耕卷

理生雖異業居世皆有務治本既在茲食力余所慕九
扈春始鳴興言向田野初來正溝塍爰方藝禾黍雖有
耘耨勞三時足甘雨歲功聿已成屢豐報田祖儲峙何
必多取具充寒暑有酒可同歡時時會鄰父既醉去悠
然登高睇平楚一為擊壤謠游心緬千古

雨中寄鄒仲熙

炎月苦淫雨抱疾坐幽居淖泥橫隘巷流潦溢深渠已
絕還往迹遂將人事疎時聞黃鳥鳴交交屋東隅豈無

斗酒酌閒玩古人書興懷在君子夙昔同歡娛契誼託
金蘭清德重璠璵跬步不可即而況千里餘仰瞻白日
暉屏翳何由舒念離余未弭單居子何如

題費同知松樹障子

當代画松誰最精王紱卓迪俱馳聲兩生以來鮮繼者
鳳池周璿新得名此圖筆有千鈞力全幅剡藤開潑墨
雙株奮起如雙蚪直氣森森勢千尺膠枝屈鐵蟠穹蒼
勁節磊砢鱗甲張長風颯颯動滿座六月清晝高堂涼
吉安別駕好奇古對此宛然巖壑趣茯苓琥珀焉足期
堅操終懷共遲暮別駕別駕臨安彥浙東山東宦游徧
四明徂徠千歲植所歷山林屢嘗見大材之成由化二

自古匠輪希得逢明堂清廟選梁柱何限空老深山中

賦得滄浪送陳景祺守襄陽

漢水帶襄城滄浪舊有名分符來五馬如練照雙旌濟
涉思爲楫聽歌想濯纓須令郡人說堪比使君清

荅黃宗載

又是三年別新來百感增薰蕕安可問枘鑿苦難勝白
髮落垂盡青山歸未能故人贈佳句擬報玉壺冰

夜發清江口

日落煙水寒解纜清江渚中夜北風來相送潭州去

過谷亭

明月轉檣竿露下孤篷濕欲繫谷亭舟沙頭風正急

夾溝遇邑人

聞道故鄉來辭家今遠近恐有南京書停舟試相問

題鄂渚贈別

鸚鵡江中紅樹鳳皇城裏青山借問來游幾日秋水蘭舟獨還

三十六灣

湘陰縣南江水斜春來兩岸無人家深林日午鳥啼歇開遍滿山紅白花

宣德丙午謁二陵二首

去年侍從謁長陵此日重來慟倍增春柳春花渾似昔獻陵陵樹復層層

君恩追憶不勝哀老淚乾枯病骨摧陵下一來腸一斷餘生知復幾迴來

過城陵磯

城頭水落石層層石上魚樵半搭罾忽望高樓出城郭舟人指點說巴陵

楊榮三首

榮初名子榮字勉仁建安人建文庚辰進士除翰林編修靖難後入直內閣更今名累官工部尚書謹身殿大學士加少師卒贈太師謚文敏有雲山小橐靜軒退思等集

錢受之云東楊久居館閣朝廷高文典冊皆出其手而應酬題贈之作尤為頗富

詩話東楊詩頗溫麗上擬
西楊不及下視南楊有餘

題馮敏山水圖

鳳池仙客天機精筆端點染真天成想當適意自盤礴
呼吸造化含元英欣然寫此得佳趣雲水微茫帶煙樹
左擎右攫森相樛恍若蛟龍飛不去懸厓峭壁不可攀
峒堯直入霄漢間幽亭卜築在深處塵氛不到清晝閒
是誰蕭散事游賞短檝輕舟自來往晚風不動碧波平
潏潏寒光映蘭槩斯人偉矣真罕儔飄飄儼若神仙流
披圖一覽發清興彷彿萬里江南秋

元夕賜觀燈

象緯臨天闕瑤臺集萬靈雲霞紛掩映星斗疊晶熒寶

地春應滿金門夜不為千官陪宴樂拜舞在明庭

鑑湖一曲為史院判題

見說山陰道湖光一鏡秋遠含晴日動迴帶晚煙浮花
發連堤樹帆飛隔浦舟橫塘空有夢未許賦歸休

楊溥一首

溥字弘濟石首人建文庚辰進士除翰林編修
靖難後轉太子洗馬宣德初以太常卿兼學士
直內閣歷官少保武英殿大學士謚文定有集

詩話三楊位業並稱
南楊詩名獨不振

楊思敬東郭草亭燕集

芝蘭本同氣桃李自成蹊感彼歲易邁肯與心賞違迨

迢禁城東桑麥連重畦
聯轡縱遐覽我懷浩無涯
惠風煦澄景微雨浥芳姿
人生有至樂舉觴歌於斯

胡廣 二首

廣字光大廬陵人建文庫辰賜進士第一更名靖除翰林修撰靖難後直內閣復名廣累官文淵閣大學士卒贈少師禮部尚書謚文穆有晃

菴扈從集

楊東里云胡公賦詩取適性情近體頗得盛唐之趣

詩話楊東里楊白花云楊白花逐風起含霜弄雪太輕盈蕩日搖春無定止樓中佳人雙翠顰坐見紛紛渡江水天長水闊花渺茫一曲悲歌思千里胡光大楊白花云楊白花渡江竟不還非汝故來急恐落泥塗間春光憔悴如花顏相思不見空長歎浮雲流水何漫漫安得隨風返高樹仍結柔條莫飛去世傳素景文賦此題蓋緣讓皇遜國而作然則兩公詩亦不無故主之思矣然邪否邪詆光大者謂金川門之變約周紀善同死既而人偵之尚在餵豕果爾則可鄙已甚觀集中過顏平原文信國余青陽祠輒有弔古之作其題宋思陵所書洛神賦云靜夜焚

香閱舊書洛神下筆意何如可憐不寫平戎策千古中興限有餘汴水園林迹已荒南來宮館燕錢塘卧薪有志圖恢復好寫招魂酹岳王其辭悽惋不類牧豬奴東里尤與相契胡語楊曰吾兩人實兄弟後死則銘及胡沒後楊夜夢偕胡泛舟自快閣至郡城下聯句胡云金螺蕭灑對芙蓉楊云鷺渚漁舟窈窕通達樹白雲秋色淨胡云故人清興酒船同河山夢冷謳吟後楊覺而續之云生死交深感慨中猶想勝緣如夙昔竝騎黃鶴過江東永嘉謝庭循為作圖相傳東里亦與紀善誓同歿後語其子曰吾若偕亡誰與尊公作傳豈兩人品行相近故友誼諄諄若是邪

滕縣隨獵

隨獵入深山山深多乳虎
虎見人來却負嵎人一向之觸而怒羣犬聞虎聲競趨
至虎傍下口亂咋虎莫當犬視齧虎如齧羊昔聞泰山麓
有虎相馳逐尼父駐遊車下問婦人哭嗚呼安得此犬在當時
盡驅猛虎食其肉重陪駕至太液池

玉砌臨無地飛夢上倚天微風斜舞燕高柳沸鳴蟬芳草茸茸細池荷箇箇員孰知丹禁裏別有好林泉

金幼孜 一首

幼孜初名善以字行新淦人建文已卯舉人授戶科給事中靖難後改翰林檢討歷右諭德掌翰林學士陞文淵閣大學士歷官太子少保禮部尚書兼武英殿大學士卒贈少保謚文靖有北征集

詩話文靖扈駕北征大漠窮沙靡不身歷故其詩時露悲壯之音

元夕觀燈應制

箇闔重重夜不扃瓊樓十二敞銀屏東風一曲昇平樂

此夜都人盡許聽

夏原吉 一首

原吉字維喆湘陰人以鄉薦游太學選授戶部主事建文初擢戶部右侍郎靖難後進尚書遣視江南水利歸掌行在吏禮兵部都察院事仁宗即位復戶部尚書加少保兼太子少傅宣德五年卒贈太師謚忠靖有集

詩話長陵靖難而後瑞應獨多黃河清甘露降嘉禾生醴泉出卿雲見野蠶成繭麒麟騶虞青鸞青獅白雉白燕白鹿白象玄兔玄犀史不一書甚矣天之難謀也當時詞臣爭獻賦頌夏公長律會粹而詳書之具見閔麗讀之如覽西周王會之圖披北魏南齊符瑞之志亦可云詩史矣特魚虞模並用殆猶遵洪武正韻乎

聖德瑞應詩

聖主膺乾運垂衣馭八區道隆堯舜比功茂禹湯俱蕩
蕩三邊肅熙熙兆姓娛普天歌至治率土發靈儲爰有
諸蕃國能忘萬里塗隨槎超瀚漫獻瑞効勤渠渺渺來
中夏惓惓覲帝居麒麟呈玉陛獅子貢金鋪紫象靈山
種驊騮渥水駒駝雞同鸞鷲文豹擬騶虞福祿身紆錦
靈羊尾載車霜姿媛更異長角獸尤殊綵檻奇音鳥雕
籠雪色烏玄龜三尾曳山鳳五花敷日上龍墀麗風回
貝闕迂禮官躬典設蕃使肅奔趨仙掌開丹宸祥煙散
紫衢重瞳欣一顧百辟震三呼茲豈尋常致端由治化
孚既將昭帝德尤足壯神都炎漢何能擬姬周莫竝驅
拜瞻嗟慶幸稱贊媿荒疎惟願皇風洽仍祈化日舒鴻

圖千載固聖壽萬年餘

黃淮一首

淮字宗豫永嘉人洪武丁丑進士除中書舍人
陞翰林編修歷侍讀左庶子進右春坊大學士
輔東宮繫詔獄十年洪熙初入內閣兼武英殿
大學士累官少保戶部尚書卒謚文簡有介菴

省愆歸田等集

詩話長陵北征留文簡輔皇太孫漢庶人中以蜚語繫詔獄十年遂以
省愆名集集中詩所云寶劍薤豐城爛斑土花碧又云十年頓足園扉
間時向牆頭看柳色是也因是受知宣廟特深當其入朝賜游西苑肩
輿登萬歲山宴太液池親灑宸翰贈行有云朝旭光升紫殿清相對清
言良慰情留之累月不盡意歸心又欲東南征鴈宕峰高高不極中有
謝公舊游蹟采芝巖可長年應在天南憶天北君臣相悅可謂千載

時

勵志

猗猗者蘭于彼空谷悠悠我思曷云其穀猗猗者蘭維
芳維馨我有好爵君子攸寧蘭之榮矣繁霜瘁之靜言
孔念中心悵而蘭之瘁矣益厚其根我之懷矣匪善奚
敦蘭之瘁矣芳華載陽淑慎其身終焉允臧

李至剛

三首

至剛名銅以字行松江華亭人洪武中舉明經
試禮部郎中出為河南布政司參議永樂初以
薦擢右通政拜禮部尚書兼左春坊大學士

詩話尚書無詩名
其僅存者頗娟秀

題王孟端送行圖

汀洲杜蘅歇南浦西風生美人鼓蘭楫路指江南行南
行向何許東望吳松去吳松秋水多綠遍芙蓉渚渚外
九龍山山邊三泖灣人家臨水住日暮采菱還采菱歌
易斷送子愁零亂愁來可奈何思滿江南岸江南不可
思動子情依依皇都春色早遲子速來歸

朱澤民秀野軒

幽居遠城郭寂寞自成村野色還通市春潮直到門竹
窗晴曬藥花塢晚開尊想象其中趣何由得具論

趙子固水仙

水精宮闕夜不閉仙子出游凌素波為愛低頭弄明月
不知零露濕衣多

趙 玘 一首

玘字雲翰祥符人洪武丁卯舉人授兵部主事
遷員外陞浙江右參政命使交趾還擢刑部右
侍郎改工部復改禮部尚書尋改兵部再改刑
部有儉父集

詩話尚書識于忠肅於弱齡可謂具知人之鑒忠肅序其詩云尚書雍
容廟堂之暇發為辭章長篇短什操楮立就有沈雄而典重者有舒徐
而優柔者有平衍而沖淡者有光采煥發而豪宕放逸者有清新流麗
而愜慨淒惋者變態不一豈區區拘泥聲律摹仿前人於萬一者之可
擬哉其稱許未免過
情蓋知己之感深矣

城南書事

三年為客寄龍沙望斷南雲不見家惟有受降城外月
照人清淚落悲笳

陳卧子云頗有嘉州之風
蔣仲舒云一字一淚

黃 福 二首

福字如錫昌邑人由鄉貢仕為主簿里官戶部
尚書卒贈太保謚忠宣有後樂堂橐

過武昌

城頭黃鶴樓城外鸚鵡洲觚稜出漢表葭葦分江流樓
棟白雲暮接天芳草秋我來吟不盡沽酒載行舟

長沙懷古

漢庭求士急洛下賈生賢損益乃長策紛更真少年楚
江魂不返宣室席空前一櫂西風過令人倍惘然

陳 璉 九首

璉字廷器東莞人洪武中以明經薦為桂林教

授遷國子助教永樂初知許州改滁州尋以揚
州知府攝州事擢四川按察使入為南京通政
使掌國子監事終南禮部侍郎有琴軒集

詩話琴軒詩較孫仲衍不及
視雪篷聽雨諸君似勝之

游新安爛柯山王喬洞

峨峨爛柯山日夕生紫煙仙人啓洞府澗水導其前白
石寒齒齒幽篁靜娟娟紺露滋瑶席慶雲集蕙楊冷風
從東來可以散煩悵萬變紛在目況覽何茫然王事有
嚴戒胡能久周旋振衣下山去滿耳淒鳴蟬

蘇小小墓

蘇小家錢塘樵李有遺墓芳姿竟何在碑石宛如故光

陰百歲短聲色幾人悟可憐墓前花涓涓泣秋露
曉發麻沙夾

昨暮維輕舸蕭條近沙渚蓬窗倚蒹葭淅瀝鳴秋雨晨
興喜光霽萬象爭快覩雙帆駕順風如鳥插新羽潮來
海氣腥浪起雪花舞行望鐵甕城雲邊見樓櫓

羅稚川山水歌為孫伯貞賦

郭熙後有羅稚川妙画往往人爭傳醉來乘興埽輕素
下筆蕭颯生雲煙天台鴈宕宛相似仙樓佛閣紛滿前
春風瑤草發幽澗暮雨藤蘿垂古阡危橋半空度羸馬
斷崖千尺飛寒泉扁舟一葉欲何往人家多住沙岸邊
牛羊雞犬各成隊武陵何必求神仙我亦平生好清致

出山自笑歸無緣還君此画三歎息羅浮東望心悠然

哀洗口

有序

南漢禹餘宮東西招討使內侍監上柱國邵廷
瑁劉鋹愛將也宋太祖受禪廷瑁言於鋹曰漢
承唐亂居此五十年幸中國有故干戈不及而
漢益驕於無事然兵不識旗鼓而人主不知存
亡夫天下亂久矣亂久而治自然之勢也今真
人已出必將盡有海內其勢非一天下不已宜
修兵為備不然率珍寶奉中國遣使以通好鋹
懵然不以為慮及宋師南伐鋹所遣將戰死始
思廷瑁言命廷瑁以舟師出洗口有譖之者鋹

遣使賜死士卒排軍門訴無反狀不能救為立
祠洗口廷瑁東莞人邵村居者即其遺族

哀洗口天為愁海風吹鬢寒颼颼五羊城頭天狗墮南
漢霸氣應全收天吳海鯨恣吞噬漠漠妖氛徧南裔皇
風聞已暢中原嶺海瘡痍待湔洗禹餘宮使輸忠言主
聰不悟誠堪憐舟師甫自屯洗口此身已殞讒人手至
今山下有遺祠日色慘澹行人悲

得家書聞舍弟琦來京喜而有賦

偶得鄉人至今秋道爾來家書千里發懷抱一時開準
擬同聯句安排共舉杯從今思更切頻上鳳皇臺

曉過黃州

黃州竹樓雪未晞獵獵寒風吹客衣征帆此時向東去
行李何日從南歸青山幾點煙際出白鳥一雙江上飛
欲訪蘇公舊游處倚篷回首思依依

七星巖

六丁何年開翠岑穹窿石室高千尋煙生丹竈火常在
花落碧桃春又深倚巖懷古有誰會埽壁題詩還自吟
日華月華去已遠玉笛誰能傳妙音

宿龍泉寺

歸鶴翩翩帶夕曛上方鐘磬隔林聞不眠一夜聽春雨
起視四山生白雲自是遠公偏好客獨憐支遁最能文
閒身安得頻來此細草長坡數鹿羣

胡儼四首

儼字若思南昌人洪武末會試乙科授華亭教諭
諭永樂初擢翰林檢討同解縉等直內閣尋遷
國子監祭酒洪熙元年加太子賓客致仕有願

菴集

熊伯幾云若思篤學好古辭氣英邁足以追蹤作者 胡光大
富贍不窮 楊東里云若思體物緣情端厚微婉 鄒孟熙云賓客鋪張至治
豐蔚為時所重 錢受之云公在內閣持論切直為同官所不容薦公
學行當為師儒奪其機務守國學踰二十年老為儒臣不得大用
作為歌詩多旅人思婦屏營吟望之辭怨而不怒有風人之遺焉
詩話長陵靖難之後簡詞臣入贊機務者七人踰年而解大紳胡若思
出績入者王行儉楊弘濟久而王亦出以是相業盛稱三楊論世者謂
解胡王三公才品學術在三楊之右使其不出發於事業必更有可觀
者然揆之以時度之以勢有所不能也賓客學文於鄉先生熊釗伯幾
伯幾學於虞集伯生故其
文有源本詩亦近西江派

遠將歸

去年與郎別楊花飛白雪今年候郎歸楊柳綠依依聞
郎買船下湘渚日日門前望行人過盡乳鴉啼徘徊
日暮空延佇攬衣回洞房對鏡卸新妝那知清漏短
但愛明月光月光照席涼於水帳裏燈花撒紅蕊好事
從來不浪傳明日升堂拜姑喜

村居秋興

草蟲階下鳴夜久猶未歇掩卷坐闌寥秋聲振林樾人
生知幾何憂來不可輟風吹浮雲開送我半窗月逍遙
步前庭孤螢自明滅

姑蘇

姑蘇城郭水茫茫往事流傳過客傷夜月人歌黃菜葉

秋風夢繞白駒場火中烏合歸真主井底蛙猶笑子陽
天下車書今混一繁華終古勝維揚

直閣即事

清曉朝回祕閣重坐看宮樹露華濃綠窗朱戶圖書滿
人在蓬萊第一峰

尹昌隆一首

昌隆字彥謙泰和人洪武丁丑賜進士第二授
監察御史永樂間改左春坊中允再改禮部主
事為尚書呂震所誣族誅有集

送孟潛陽先生教授邵武府學

理權辭京都之官越閩嶺樵峰渺何許川塗邈脩迥霜

雪歲暮繇朔風吹雲冷嚴程既難滯別思當自領清波
漾寒色孤帆明夕景已過落星灣遠望杉關境橫經守
清秩郡教知獨秉遐想諸生徒三席待開省

吳溥 三首

溥字德潤崇仁人建文庚辰進士授翰林編修

永樂初陞修撰遷國子司業有古崖集

胡若思云先生志不

事浮藻故其詩質實不浮殆所謂布帛菽粟而溫厚和平之意藹然見於辭氣之表其視世之纖媚工巧者不侔矣

詩話博士聘君真人詩格楚楚不若聘君之塵腐滿楮也

寄宋子環

聖恩寬逐客不遣過輪臺談笑潼關去雲霞仙掌開故
鄉深念汝遠道竟能來明日相思處高秋鴻鴈迴

自歎

去鄉三十年顏貌總非昔昨日鄉人來相看不相識

悼外姪戴積善

遠樹千重暗江聲日夜哀終南山下路不見汝重來

王景 一首

景字景彰以字行松陽人洪武壬子領浙江行
省鄉貢進士授懷遠教諭遣戍雲南建文初召
修高廟實錄陞禮部右侍郎兼翰林院侍講充
副總裁官靖難後進學士

古詩

詩話靖難師入相傳學士請葬建文君以天子之禮然鍾山不聞有封穴或請而不允也古風一首其一不無故主之思因錄之

皇天無停樞四運迭相迫朝陽忽東升悵望倏已夕伊
誰執其馭六轡不遑息使我下土人俯仰空役役我願
攀六龍駐彼扶桑域遨遊黃道中流光自輝赫萬物同
一春欣欣布嘉澤羲和不我與徒有淚霑臆晝短夜乃
長何以屏陰慝

王 達 二首

達字達善無錫人洪武中舉明經為大同訓導
薦入官國子助教永樂初擢翰林編修遷侍讀

學士有耐軒天游二橐

黃才伯云耐軒詩有唐人風韻

詩話耐軒與大紳孟敷汝玉希範號東南五才子其詩太便利不耐咀嚼然如送人入都作起句云鶯啼細雨中一騎發城東又送人從車作云細雨都門西東風驛路塵未嘗不矜練也

題山水

一曲清琴酒一卮煙蘿贏得任棲遲千峰黛色嵐消後
十里菱花子結時水氣入樓人不覺秋聲到樹鶴先知
世無謝眺誰同語對画空成萬古思

題扇

葉暗前朝雨花飛昨夜風空山人不見春在綠陰中

王 璩 五首

璩字汝玉後以字行長洲人洪武中舉浙江鄉
試以薦攝府學教授改應天訓導擢翰林五經
博士永樂初進檢討再進春坊贊善下詔獄死
洪熙初贈太子賓客謚文靖有青城山人集

徐子元云

汝玉不及高
楊漸入清雅

詩話翰林四王竝稱而汝玉弟璉汝器璉汝嘉一門又有三焉其詩不
費冥索斤斤唐人之調吳人徐用理集永樂後詩家三百三十人以汝

玉璉
卷焉

和高季迪將進酒

君不見雲中月清光乍盈還又缺君不見枝上花容華
不久落塵沙一生一死人皆有綠髮朱顏豈能久尊前
但使酒如澠肘後何須印懸斗臨邛壚頭綠蟻香楊花
卷雪春茫茫吳姬越女嬌相向痛飲須盡三千觴興來
狂笑縱所適慎勿畏他權貴客東風吹落頭上巾此夕
獨醒端可惜

題採菱圖

有序

苕溪余舊所經游秋高氣淒風清水落遠近漁
歌更唱互答舟行沿洄恍若世外別來不知幾
寒暑矣中吳徐希孟攜謝孔昭所臨松雪翁採
菱圖索詩為作吳歌題其上不能不動江南之
思也

湖南風信起湖北浪花多欲唱採蓮曲翻成採菱歌採
菱歌斷汀洲暮何處却尋歸去路誰搖蘭艇笑相迎燈
火遙生白蘋渡

新秋早朝

宮井梧桐一葉飛新涼先到侍臣衣蒼龍闕上銀河轉
丹鳳樓頭玉漏稀曉仗分行環御輦夕郎鳴佩出仙闈

自憐虎觀叨陪從簪筆慙無補萬幾

瓜洲道中

清江杳杳水連空江北江南綠映紅三月異鄉逢換火
經春游子怨漂蓬滿汀蘆葉鹽檣雨一樹梨花酒旆風
遙望故山何處是依稀煙霧五湖東

方壺画

紫府深沉白晝閒仙人歸去邈難攀當時暫謫來塵世
寫遍江南雨後山

王洪五首

洪字希範仁和人洪武丁丑進士授行人永樂
初擢吏科給事中入翰林為簡討歷修撰侍講

左遷禮部主事有毅齋集

徐子元云希範詩清雅惜氣不足
吳明卿云希範擬陶風味

似晉舟中雜興聲調
似唐皆非人所易及

詩話希範詩最為孟敷所重至不敢與鴈行其對張宗海論詩自誦所
作竊比漢魏張晒而未荅復曰終不作六朝語張曰子詩傷大李門牆
猶未窺其奧也希範始屈服今誦其詩
率規仿唐人具體而已品當在孟敷下

歌風臺

赤精自天啓黃屋凌空開富貴歸故鄉遂築歌風臺佳
人弄瑶瑟故老持金罍酒酣自擊筑浩歌何雄哉颯爽
龍虎姿曠蕩風雲懷顧為萬歲後英魂尚歸來回首望
彭城孤臺亦崔嵬百戰功不成千載令人哀

擬劉公幹

園林多嘉木秀氣何蒼蒼石梁冠崇阿淶水流方塘行

樂在良夜飛蓋復翱翔涼風振華纓明月揚其光清池
散芙蓉秋蘭一何芳君侯壯思發逸藻凌風揚小臣信
愚劣狂歌安所詳

擬陶彭澤

我家南山下前有嘉樹林好鳥鳴其巔涼風吹衣襟泛
此尊中酒撫我膝上琴禾黍亦已繁桑麻藹餘陰如此
良易足勞生非所任

畦樂詩

索居南野外頗與人事疎灌木蔭前庭隙地數畝餘蔬
果因時藝蕙言理其蕪聊以足晨夕過茲奚所須固窮
亮吾分貪得寧非愚草糗可終身樂哉常晏如

舟中雜興

故國遍芳草高臺多大風河山千古在登眺幾人同野
澤鳴山雉荒陂起塞鴻新豐不可見煙樹五陵東

王紱 十七首

紱字孟端無錫人洪武中就徵坐累戍朔州永
樂初以善書薦供事文淵閣拜中書舍人有友

石山房橐

胡光大云孟端律詩學大曆諸才子時有警句章昞
如云孟端不羈之才所作古詩類韋柳律詩類晚唐

曾子啓云孟端觸景撫事即形之於詩隨其興之所至情之所發初不
計其工拙而自合矩度王汝嘉云孟端幼負瑰偉之才游學邑庠時
鄉之先進若四輔官周士平侍讀學士王達善長史錢仲益教諭呂志
學引禮舍人浦長源輩皆以詩著名於時過從磨和甚為諸公稱許集
中長篇短章春谷兩雅無斧鑿痕而理趣兼至李時遠云舍人
詩清新典麗其其人 繆天自云舍人詩格疎爽有松石間意
詩話錫山自倪元鎮後孟端山水竹石瀟灑出塵筆蹤可繼人品亦未
多遜在京邸與一商人鄰居月下聞吹簫聲明日往訪之寫竹以贈曰

我聞簫聲用以簫材報其人不解事以紅瓊璣為餽乞再寫一枝為配
孟端大笑取前画裂之又嘗退朝黔國公從後呼之孟端不應私念曰
是必索我画爾後十年寫尺幅萬里遺焉予嘗見孟端為惠山僧画竹
茶壚圖羣賢題咏甚眾今存顧典籍貞觀山莊當時夏太常景亦善寫
竹儲藏家得其十幅不敵孟端之一也詩亦清疎一如其画章舍人晒
如狀云永樂初詔求天下文章之士洎善書者各二十八人登文淵閣
公被首薦蓋與吉士竝入
直者此國史所未詳也

送楊德昂

我適桑乾歸君猶五溪去飄流若萍梗何繇復相遇迢
迢江上山歷歷煙中樹後夜月明時相思渺何處

題秋菊軒

九月霜露零秋氣已云肅草木盡彫瘁而有籬下菊粲
粲如有情盈盈抱幽獨我欲餐其英采之不盈掬呼兒
具雞黍白酒正可漉素心二三人於焉敘心曲陶然什

一醉萬事亦已足詠歌柴桑詩千載想遐躅

寫竹寄顧謹中

秋聲起巫峽暝色迷湘渚悵望千里遙佳人渺何許幽
期邈難值欲往復延佇中夜獨遐思西窗颯風雨

題成趣軒

桑麻日已長稼穡日已成門巷蔭榆柳隔屋縑車鳴生
平寡營為遂此田園情衣食喜不乏公賦尤寬平舉家
情欣欣澹然忘世榮力作雖云勞濁酒時共傾豈意事
高尚所樂安吾生

臘日

大化無停機寒暑如循環歲華忽云暮陽和亦已還人

生百年內憂喜互相關顧匪金石姿安得長朱顏達人
會斯理意與雲俱閒聞道媿獨晚衰也吾何歎

題青山白雲圖

我昔九龍山下住結廬正在雲深處日日看山還看雲
長教剪却當檐樹無端一別猿鶴羣馬蹄南北徒紛紜
塵塗底事拂衣晚回首媿負山中雲

送張知縣

作宰麻陽去民風雜五溪世傳盤瓠後地接夜郎西臘
釀多藤酒春禽半竹雞到官應有便莫惜寄緘題

靜趣軒

竹樹陰森映短牆蕭然絕俗似僧房出城相去路三里
閉戶獨眠書半牀風煖林花飄几席雨晴沙鳥入池塘
慚余擾擾紅塵客到此猶能百慮忘

送陳尚賓還靖州

嗟余湖海度年華爾復飄零更可嗟舊業整歸翻似客
異鄉重到即為家江連雲夢孤帆遠日落衡湘斷鴈斜
後夜月明何處泊相思回首各天涯

峽中雜詠

峽裏山高多晝陰未昏煙景暗秋林停舟晚飯柁樓底
猶有夕陽明遠岑

靜樂軒

二首

竹几藤牀小硯屏薰風簾幕篆煙青閒齋幾日黃梅雨

添得芭蕉綠滿庭

斗帳藏春日醉眠靜中惟與嬾相便尋常甲子無心記
看得梅花又一年

皆山軒

嵐光飛翠入簷楹枕簟生涼暑氣清公退日斜新浴罷
坐看峰影過州城

塞上雜詠用偶武孟韻

漫天風雪掩穹廬客裏誰來問起居忽報鄉人喜新到
寄來猶是隔年書

題靜照軒

尋常客不到山家松火寒爐自煮茶風雪閉門才十日
不知春已到梅花

題枯木竹石寄李公實

罨画溪邊水拍隄繞隄高樹倚雲齊君家正在樹深處
滿地綠陰山鷓啼

茅齋煮泉圖

小結茅齋四五椽蕭蕭竹樹帶秋煙呼童埽取空階葉
好煮山廚第二泉

錢仲益八首

仲益無錫人永樂初以翰林編修轉周王府長

史有錦樹集

魏仲房云先生詩有體裁麗而不浮奇而不僻易而不俚

詩話長史詩格爽朗惜遺集罕傳子從秦對巖前輩購得亟錄其八首猶未盡其蘊也

送范宗暉赴雲南從軍

投老怕送別送別即傷神况茲所別者乃是平生親行
行赴何許遠在天之垠迢迢萬里餘欲見將何因近別
猶不堪遠別情曷伸翻嫌交密友不若交疎人我昔初
還鄉憔悴賤且貧子來客吾邑漂泊埋風塵一見如舊
識歲久情逾真自謂同心交不獨雷與陳我入訓鄉校
子來寓城闈燕語恒及酉諷詠或達晨中間羅變故別
我遊江濱陶朱既遠越張祿遂入秦間闕幾四載會晤
復喜頻明年上京都聘充戚里賓我亦被薦書謁選拜
紫宸繆居容臺屬幸得聯朝紳與聞復聚首相見不隔
旬念子有俊才倜儻無儔倫財輕大義重實謂勇且仁

願言永相從誨語煩諄諄夫何事難料告别何踈踈從
軍赴滇陽西去逾峨岷吾皇啓昌運萬物皆維新及茲
豔陽月鶯花曜青春惜子獨遠去書劔行隨身騏驥豈
繼羈鷗鷲非籠馴丈夫志四方豈必長相憐嗟我已暮
齒雙鬢垂秋銀受刃割老腸容易生酸辛予時在史館
寅入出已申不暇持一觴送子龍河濬江之水滔滔楚
山青嶙峋咄此可奈何淚下霑衣巾

題王孟端画送祖韶石歸惠山

危石壓寒篠高松挂枯藤長懷故山景况見故山僧僧
今歸故山我歸嗟未能題詩送僧歸悵然離思增

中秋翰林夜集分韻得月字

雨餘殘暑謝夜久官事歇庭空起商飈雲霄吐華月於
時秋方半古桂黃初發玉堂集僚友清燕足怡悅送鉤
行觴頻分韻催詩切玉輪懸中天光輝轉明潔有如坐
冰壺爽氣徹肌骨微聞更漏響漸見明河没人生寡歡
會員魄亦易缺莫辭通夕玩動是經年別

牧牛圖

東皋二月春草生江邊放牛花雨晴牧兒唱歌牛齧草
穩坐牛背隨牛行牛角攢攢耳濕濕斷隴荒陂隨意入
煙蒲風柳不勝情日暮歸來荷蓑笠我本山林牧牛叟
濫著朝衫今白首擬買江南黑牡丹乞取閒身老農畝

青山白雲圖

連山盤盤隔溪水翠滴風光淨如洗松梢日出初雨晴
滿地白雲收不起溪窮路轉石徑斜隔溪遙見山人家
柴門深閉人不見煖風吹落朱藤花良工貌得無窮景
坐玩令人發深省何由築室住山間長卧雲窩弄秋影

題江南春雨圖

羣山鶻突雲模糊長蘿遠水連平蕪孤村絕浦望不極
幾家茅屋懸魚眾輕舟數點小於葉出沒煙浪同飛鳧
江空雨勢來不已水風颯颯吹菰蒲前山禪宮白雲際
明滅時見金浮屠貌將一段丘壑趣寫出萬里煙霞圖
憑軒寂聽無所見彷彿似有青猿呼我昔南遊會稽上
雲門六寺尋僧徒手支枯筇躡短屐窮幽陟險隨樵夫

曉雲漫天失老鶴暮雲擁樹聞飢鳥石厓松瀑濺飛雪
水聲活活風胡胡若邪溪深不可渡沿流細路行縈紆
歸來濯足憩小軒甯中塵氣一點無自從江海困奔走
衝寒觸暑趨長塗追思勝賞不可到十年南望空嗟吁
朝朝覽鏡獨惆悵兩鬢雪白容顏枯東陽山人特好古
寶此名筆如瓊珠吳箋一幅不滿尺懷山卷海置座隅
鋪牀展軸看未了何異短褐藏天吳王郎妙手信莫及
功與小米論錙銖想當運意揮染際倒瀉水墨翻金壺
祇今此景在何處欲往不得歲已徂還君此画重太息
嗒焉長吟據槁梧

錢達可山房

苦憶錢夫子幽居嶧嶸山問梅殘雪外采藥亂雲間塵
暗芸籤冷香銷蕙帳閒斷腸泉上月依舊照松關

游蓬萊道院聽李天山鼓琴

仙人鼓琴花滿庭我亦洗耳爲君聽風搖空林夜瑟瑟
泉落幽澗秋泠泠平生青袍作行客千載絕調聞廣陵
曲終日落醉歸去無數好山天外青

梁潛一首

潛字用之泰和人洪武丙子舉鄉試授訓導永

樂初名修實錄陞翰林修撰歷右春坊右贊善

帝北狩留監國中讒死有泊菴集

楊東里曰用之
詩高處逼晉宋

合州寫懷

明言總卷十七
忘却儒官冷誰為蜀道吟一身猶長物萬事豈關心水
鳥窺魚立山雲帶雨沉人生聊適意莫受旅愁侵

鄒 緝一首

緝字仲熙吉水人洪武庚辰進士除星子訓導
永樂初入為翰林檢討歷官左春坊左庶子有
素菴集

翰林院齋宿聽琴詩

并序

永樂三年春正月丁未上將祀南郊誓戒羣臣
致齋三日百官既受誓各就宿別館於是侍讀
曾公日章脩撰錢公仲益徐公孟昭檢討蘇公
伯厚沈公民則暨無錫王公孟端與予凡七人

皆會宿於翰林之公署於時天宇澄霽月色清
朗諸君子相與秉燭坐於公署之東偏沈公善
琴因請鼓之作商調數引舒徐安適淳古澹泊
有三代之遺音坐者聽之莫不心暢神怡乃相
與分韻賦詩以紀其事且要孟端為之圖云

禁直夜迢遞齋居澹無為同心聿來集良友具在茲懼
言適嘉會秉燭坐彈碁華月照虛牖微風動綺帷上客
發幽興援琴揮素絲一彈孤鶴舞再鼓心神怡清商既
激烈雅調亦舒遲秋鴻唳遠空倚蘭芳葳蕤俯仰極餘
韻邈與高山期燕賞亦云洽傾耳遂忘疲沉吟永終夕
逍遙起遐思仰觀庭戶間爛然明星垂旭景不知曙永

言歌此辭

蘇伯厚 二首

伯厚名埈以字行建安人洪武中以薦授建寧府學訓導遷晉府伴讀永樂初擢翰林侍書遷檢討以子鎰仕贈吏部員外郎有履素齋集

詩話蘇君傳詩絕少其五言神意閒審綽有魏晉風陳嗣初稱南閩偉奇超卓之士必以蘇先生伯厚為之首不誣也

偕諸公齋宿聽琴作

玉署宿齋居盍簪諧素約坐中有鳴琴宮商時間作波澄楚江秋露下九皋鶴流泉響幽澗靈籟起寥廓維時雨初霽微月映疎箔鑪熏輕煙裊燭花紅燼落春風送餘寒夜久覺衣薄清談雜今古亦足資一噓相對竟忘

眠更取茶甌淪雞鳴整朝冠晨鐘動高閣

畦樂詩

青山遶我屋垂柳蔭我門來往絕塵鞅世事邈不聞惟有衣褐徒鄰曲相與言孰云生計拙亦有數畝園清晨荷鋤去除彼蔓草根但使無饑饉豈惜筋力煩濯足清澗濱矯首觀飛雲牀頭有濁酒欣然自開尊

張洪 一首

洪字宗海常熟人洪武中謫戍雲南永樂初授行人仁宗召入翰林改修撰有集

錢受之云修撰吳中宿儒貫穿宋人

經學歸田之後鄉邦制作咸出其手歌詩非其所長詩話張宗海集一冊予在史館曾見之無足采者仍錄東門行一首

古東門行

僕夫顧我悲轅馬跼不行古來離別地青草不復生居
人攀桃李悵望難為情流塵起阡陌遠樹花冥冥莫向
秦東亭唱此東門行土中有死骨聞之復心驚

曾

烜
二首

烜字日章以字行吳江人洪武間以歲貢授黃
陂知縣考最陞翰林院侍讀同修永樂大典使
交趾卒于富良江

舟至辰陵磯與楚百戶言別

江到荆湘兩派分客情無奈况離羣爾從三峽迎春水
我過重湖望楚雲白帝至今啼蜀魄蒼梧何處弔湘君

孤舟夜向巴陵泊一曲商歌不忍聞

寄友人

與君離闊十年餘兩過江濱候起居咫尺猶如千里別
飄零不寄一行書何時夏口同傾蓋此日王門好曳裾
若問故人何似者鬢絲今已不勝梳

黃守
一首

守字約仲以字行莆田人以汀州府學教授擢
翰林院檢討有靜齋集

題燕文貴秋山蕭寺圖

迴崖列岫鬱相連兜率樓臺際碧天飛鳥已還秋色裏
疎鐘猶在夕陽邊溪橋緩轡官人馬野飯維稍客子船

記得宦游逢此景披圖不覺思茫然

虞謙一首

謙字伯益金壇人洪武中由太學生擢刑部郎出知杭州府永樂中召為大理寺少卿仁宗監國奏除都察院左副都御史轉大理卿有玉雪

齋橐

楊東里云大理善寫山川木石幽澹簡遠亦以工詩名於時

田家晚泊

風磴翻危葉霜槐出斷根過橋逢野老倚杖候柴門
馴犬熟迎客歸鴉遙認村茅檐投晚泊煙霧斂初昏

熊直二首

直字敬方其初冒姓胡吉水人永樂中舉人以

子槩貴贈右都御史有西礪集

立秋後有懷京洛諸故舊

秋序昨夜至炎蒸尚復然青山不改色黃葉墮我前物
性固細微乃得氣之先人生宇宙間俛仰終百年質非
金石固豈得恒雕鐫朱顏亦易失皓髮無由玄念我平
生友聚散如雲煙行止固不齊所賦良由天昨尋東籬
菊欲買南山田安分乃吾事富貴甘棄捐

瀟湘雨意圖

萬竹叢深日未晡寒江煙雨翠模糊東風無限瀟湘意
獨倚篷窗聽鷓鴣

陳繼二首

繼字嗣初吳縣人經歷汝言子用薦授五經博士領弘文館事進檢討有怡菴集

詩話嗣初為性允遺孤惟允坐法誅家無長物惟閱過書二萬餘卷其母吳教之成學以薦授五經博士時獻陵於大內之西思善門闢弘文館命揚學士溥主之嗣初與王侍講璉入直焉其詩本之家學持論以為詩者非得乎天地之清氣則無以極其妙今所存怡菴集一十五卷詩未之錄嘗見題漁父圖有云夕陽漸紅江轉綠分明画出一幅漁村晚景也

烏夜啼

宮井烏啼宮樹碧月色生寒露華白啞啞不斷深夜閑
明朝車馬天際還綠窗美人歡不寐未曉凝妝貼珠翠
秋夜雨中懷施孟端

愁雲接地陰城漏更沉沉寒雨驚秋盡殘燈入夜深淒涼千里客惆悵百年心誰料分攜後防邊直到今

陳亢宗一首

亢宗名宗以字行永嘉人官兵部員外郎

詩話員外午門觀燈應制詩景陵品居第一然實遜曾襄敏陳文定諸公送友一律調雖存弱源本隨州

送友人歸崑山

官亭把酒送君歸回首吳山驛路微久別方期同笑語
相逢那忍又分違平蕪積雨迷征騎疎柳寒煙掩舊扉
此去思親還望闕朝朝應對白雲飛

袁珙一首

珙字廷玉鄞人以相術拜太常寺丞有柳莊集

詩話寺丞得相法於別古厓識文皇於潛邸遂遷寺秩然家本土族其父彥章仕元為翰林國史檢閱世稱菊村先生嘗作布衣歌云我家頗讀書初非田舍翁蓋道其實也寺丞於九流百氏靡不涉究歌詩亦能入格不失菊村家數

長相思

有美人兮天一方丹霞為織雲錦裳盤龍舞鳳交鴛鴦
昔年飲我瓊瑤漿贈我白玉雙明璫欲往從之楚山長
安得羽翼同翱翔望望不見令我傷仰天悲歌涕浪浪
明月在戶光滿堂牽牛織女遙相當長相思愁未央

素忠徹 一首

忠徹字靜思珙之子以父廕由鴻臚序班歷官
尚寶少卿有符臺外集

和寔郎中同竺菴見贈韻

夕雲斂餘暉稍稍歸鳥集清磬林際響
歌峰外急懷人南斗邊露下銀漢濕
瑤草春復生深山共誰拾

徐晞 一首

晞字孟晞江陰人永樂中由縣功曹累官至兵
部尚書有暨陽遺橐

感懷

十年騎馬戰龍沙不道功成兩鬢華
昨夜思歸有鄉夢江南春色遍梅花

劉鷹 一首

鷹字士瑞青田人誠意伯基之孫洪武庚午襲
封辛未貶秩丁丑戍甘肅尋赦還永樂中卒于

家有盤谷集

錢受之云公侯伯襲封底簿據兵部貼黃鷹以洪武二十三年十月襲爵次年九月卒吾學編諸書並同致鷹所著盤谷集及括蒼陳谷間先生傳乃知鷹罷官謫戍本末且永樂中尚無恙貼黃載鷹以襲封次年卒諸書因之皆誤也

詩話趙周臣自號閒閒居士士瑞亦自號閒閒子其集名盤谷者士瑞襲爵之後貶秩歸農築室於青田舊宅之西雞山之下因其地山水盤旋故以名焉詩師吳興沈原昭

孟春贈徐仲成

故人訪幽居時當孟春節寒氣尚嚴凝同雲靄欲雪長
論懷始舒高吟興不絕開窗對松竹蒼翠色可悅豈不
念榮華泉石甘守拙閉門有餘暇開卷對前哲長歎古
今事理義同一轍世隨氣化遷運逐人情別雖非聖賢
資勉焉慕貞潔榮煢且獨守默默誰與說惟有知心友
時過共挾揭但願無聞知豈敢尚英傑援筆賦新詩舉
觴對明月高歌神鬼驚長嘯天地闊彭澤千載人百世
誰能越高山與流水此興不可遏

春游田家四景之一

竹籬茅舍兩三家屋外青山綠樹遮行客偶來春日暮
山南山北杜鵑花

郭武五首

武字昺隆贈定襄伯鈺長子官尚寶司丞詩見
懸珠集

晚渡白馬湖

輕風小寒吹浪花新柳茸茸啼乳鴉平湖一望幾千頃
遠水連天飛落霞斜陽忽墮澄波底白鳥猶明山色裏
巖吏何處鼓鼙鼙權歌未斷漁燈起

寄劉革窗原博

空堂獨坐葉紛紛一鴈南飛不可聞野色連天迷遠望
高城落日亂寒雲故人眼底無多在客思秋來又幾分
莫怪臨風倍惆悵江鄉猶憶白鷗羣

江南懷古

隔斷中原數百年囊沙堪笑况投鞭桓温不合留王猛
安石終能舉謝玄日落暮雲斜度鳥雪消春水遠連天
子山空有江南賦北府淒涼最可憐

江上即事

綠水橋邊酒店白鷗沙上漁家山前山後春雨江北江
南落花

宿澧陽

蘋花風急水茫茫今夜孤舟宿澧陽誰在江城吹画角
五更殘月一天霜

沐昂一首

昂字景顥黔寧昭靖王之子以左都督鎮守雲
南卒贈定邊伯謚武襄有素軒集

詩話定邊平麓川之寇威著西南而能以餘暇留情文詠輯明初名下
士官於滇及謫戍者自郝仲經以下二十一家詩凡二百五十首目曰
滄海遺珠楊東里序之謂當時選錄諸家劉仔看過略王偁雖精
且詳猶未免有遺惟沐公所擇和平婉麗可玩可傳其賞識若此

送胡橙軒還永昌

有客乘驂過洱西平原春草正萋萋人煙迢遞連金齒
山勢逶迤拱碧雞流水小橋楊柳綠落花微雨鷓鴣啼
遙知別後相思處雲樹蒼茫夢欲迷

明詩綜卷十七

明詩綜卷十七

三



